



周益公集

平園續稿卷第十二

周益文忠公集五十

精  
益  
公  
集  
卷  
十  
五

序一

傅忠肅公察文集序

二帝三王時人才多出於國子蓋其見聞積習作成有  
素非如秀民必俟族黨州鄉賓興之然後用也觀舜命  
夔典樂教胄子曰直而溫寬而栗剛而無虐簡而無傲  
及命契為司徒教民則敬敷五教在寬而已周官大司  
樂以樂德教國子曰中和祇庸孝友及司徒以三物教  
萬民則置禮樂於六德六行之後其視成材詳畧次第  
固有別矣夫子不云乎興於詩立於禮成於樂學至於

樂則義精仁熟和順於道德而性成焉故以之事親必  
孝事君必忠臨大節必不可奪文其餘力也晉唐以來  
名學與監置祭酒若司業皆冠以國子是亦古之遺意  
歟本朝世臣巨室前後相望在仁宗時有若獻簡傅公  
諱堯俞未冠以進士起家平居號稱長者及事四朝屢  
歷言路忘身徇國有不可奪之節遭時遇主致位二府  
生都美譽沒保令名遂為大家其從孫忠肅公諱察年  
十有八復踐世科宣和末以吏部郎假宗正廷勞金國  
賀正使行及境上會幽燕交兵或勸其歸公不可猝遇  
幹离不强公使拜公又不可竟握節死之詔贈徽猷閣

待制乾道中追賜今謚其諸子皆以問學才猷翱翔仕  
塗至孫伯壽文采益高方以直煥章閣按行畿部興念  
前烈既編定獻簡公草堂集又哀公遺稿成三卷將傳  
之四方屬其序其首惟公文務體要辭約而理盡甚類  
獻簡詩尤溫純該貫間次險韻愈多而愈工惜乎享年  
纔三十有七名宦未達高文大冊無自而發其淵源則  
可考矣竊嘗論之獻簡幸生太平無事時止於正言不  
諱是以為宋良臣公則不幸將命艱難之際伏節死難  
遂在忠臣之目要之忠孝大節易地皆然特所遇不同  
耳故為推本帝王之教以及本朝之盛使學士大夫知

公世濟其美不隕其名者如此慶元三年正月

歐陽文忠公年譜後序

文忠公年譜不一惟桐川薛齊誼廬陵孫謙益曾三異三家為詳雖用舊例每歲列其著述考文力之先後然篇章不容盡載次序寧免疑混如公曾孫建世以告勅宣劄為編年尚多差互况餘人乎今參稽眾譜傍採史籍而取正於公之文凡居士集外集各於目錄題所撰歲月而闕其不可知者奏議表章之類則隨篇注之定為文集一百五十三卷居士集五十卷公所定也故寘於首外集二十五卷次之易童子問三卷

詩本義別外行於世

制集三卷內制集八卷表奏書啟四六集七卷奏議十八卷雜著述十九卷集古錄跋尾十卷又次之書簡十卷終焉考公行狀惟闕歸榮集一卷往、散在外集更俟博求別有附錄五卷紀公德業此譜專叙出處詞簡而事粗備覽者當自得之慶元二年二月十五日

元稹六一書闕歸榮集一卷却他集間有致仕後雜著數篇遂以其類分寘外集中今得六一當時自編此卷其數正同乃知所分不可易也今以元篇列於總目之後毫髮無遺恨矣嘉泰四年中秋續題

歐陽文忠公集古錄序

右集古錄序成於嘉祐末年其云有卷帙次第無時世先後蓋取多而未已故隨其所得而錄之此公述千卷不以世代為序之意也又云撮其大要別為錄目因載夫可與史傳正其闕謬者以傳後學此公述錄目跋尾之意也至熙寧二年公之子叔弼記其後云公命棐曰吾跋諸卷之尾者二百九十六篇若撮其大要別為錄目則吾未暇棐乃盡發千卷著其大畧自今觀之公序明言別為錄目而棐乃記公未暇之語世傳集古跋十卷四百餘篇而棐乃謂二百九十六篇雖是時公尚無恙後三年方薨然續跋終十餘耳不應多踰百篇得非

寫本誤以三百為二百或棐記乃熙寧之前耶棐又云為十卷附跋尾之後今錄目自為一書乃二十卷不過列碑石所在及其名氏歲月初無難者何未暇之有是皆可疑姑以棐所記附公本序之後而自周秦至於五季皆隨年代為之序庶幾時世先後秩然不紊間有書撰出於一手其歲月相邇則類而次之又於每卷之末備存當時卷帙之次第既以便今亦不失其初云

### 歐陽文忠公集古錄後序

集古碑千卷每卷碑在前跋在後衛幅用公名印其外標以緗紙束以縹帶題其幟曰某碑卷第幾皆公親蹟

至今猶有存者按公嘗自云四百餘篇有跋今世所傳本是也其間如唐鄭權碑乃熙寧辛亥歲跋又至明年正月方跋鄧艾碑李德裕山居詩四月題前漢鴈足鐙銘後數月而公薨殆集錄之絕筆也方崧卿裒聚真蹟刻板廬陵得二百四十餘篇以校集本頗有異同疑真蹟一時所書集本後或改定今於逐篇各注何本若異同不多則以真蹟為主而以集本所改注其下或繁簡遼絕則兩存之如後漢樊常侍碑真蹟作永壽四年四月而集本改作二月訪得古碑二月為是至於以始元為漢宣帝年號又稱後周大統十六年唐大足二年之類乃公一時筆誤不敢有所更改

集古跋既刻成方得公子叔弼目錄二十卷具列碑之歲月雖朝代僅差一二而紀年先後頗有倒置已具其下

### 歐陽文忠公集後序

歐陽文忠公集自汴京江浙閩蜀皆有之前輩嘗言公作文揭之壁間朝夕改定今觀手寫秋聲賦凡數本劉原父手帖亦至再三而用字往往不同故別本尤多後世傳錄既廣又或以意輕改殆至訛謬不可讀廬陵所刊抑又甚焉卷帙叢脞畧無統紀私竊病之爰欲訂正

而患寡陋未能也會郡人孫謙益老於儒學刻意斯文承直郎丁朝佐博覽群書尤長考證於是徧搜舊本傍采先賢文集與鄉貢進士曾三異等互加編校起紹熙辛亥春迄慶元丙辰夏成一百五十三卷別為附錄五卷可繕寫模印惟居士集經公決擇篇目素定而參校衆本有增損其辭至百字者有移易後章為前章者皆已附注其下如正統論吉州學記瀧岡阡表又迥然不同則收寘外集自餘去取因革粗有據依或不必要存而存之各為之說列於卷末以釋後人之惑茅首尾浩博隨得隨刻歲月差互標注抵牾所不能免其視舊本則

有間矣既以補鄉邦之闕亦使學者據舊鑿新思公所  
以增損移易則雖與公生不同時殆將如升堂避席親  
承指授或因是稍悟為文之法此區區本意也六月己  
巳前進士周某謹書

劉彥純和陶詩後序

歌詩之作在國則繫其風化在人則繫其性習勤而不  
怨憂而不困以至泆乎風乎之類識者一聞遺音  
不待入國風化固已可知人之文章苟蘊諸中必形諸  
外特用力有淺深故下語有工拙爾唐人鮮不能詩雖  
體格或不同而各能成其材是無他不強所短而擅焉

不棄所長而畫焉因其性而加之習茲所以名家也歟  
安福縣劉君彥純諱承弼紹興丙子乾道戊子兩薦於  
鄉既下第即隱西溪淳熙三年邑人舉其節行詔旌表  
門閭常慕五柳先生為人畫和其詩百篇煥章閣待制  
揚公廷秀為之序盛行於江西而其弟之壻趙伯琢復  
求予題其後予告之曰彥純此詩殆得於唐人非得之  
五柳也伯琢駭而請其說予曰平澹簡易忘懷仕進彥  
純之性也不擅不畫畫吾之才彥純之習也昔魯男子  
夜閉戶拒鄰婦曰子何不若柳下惠男子曰子與吾  
皆幼柳下惠固可吾固不可吾將以吾不可學柳下惠

之可孔子稱其善學今吾彥純蓋有得於此信予斯言  
然後知淵明春蘭秋菊松風澗水果在彥純破琴斷絃  
中廷秀真知音哉慶元二年四月日

元豐懷遇集後序

吏部尚書贈少師王公子發序其西掖制草謂自高祖  
晉公曾叔祖魏國文正公以及其身世掌絲綸名集曰  
懷遇而不曰榮遇者謙也恭惟太祖太宗削平僭亂勃  
興文治士生斯時以登畿為榮而晉公知制誥在乾德  
之三年至太平興國八年真拜舍人雍熙末出院終四  
歲而文正已踐父官蓋淳化二年也至道三年章聖即



戶部公集 卷之三  
位乃遷內相父子繼遇明主出雷風之令鼓舞多士播  
紳榮之後八十餘歲當元豐六年十月公復紹高曾之  
業越二年進給事中是時裕陵董正治官為文章煥焉可  
述宣仁哲廟大收人才協成初政潤色之功尤多蓋三  
世代言俱接武於兩朝可謂榮也已矣慶元丙辰公曾  
孫淹為廬陵郡丞太守楊侯方得是集而悅之將刻板  
布之四方謂某紹興乾道間嘗典斯事俾作後序記其  
本末昔官制初行舍人曾南豐也一日除郎御史數十  
人公為都司付制吏部讀而歎曰本原職守為之訓勅  
人不同咸有新趣而衍裕雅重自成一家予謂欲知

公制詞之美此數言盡之矣豈所謂夫子自道者耶至  
於追爵荀况揚雄韓愈三制簡古明粹殆與西漢詔令  
相為表裏嗚呼盛哉集凡七卷制詞四百餘首或疑末  
卷它文十八篇不當入集按宋元憲掖垣叢志云中書  
因事表狀道釋齋贊蹟語並當制舍人撰近世此例方  
廢併書以告來者七月十日

朱新仲舍人文集序

藝之至者不兩能故唐之詩人或畧於文兼之者杜牧  
之乎苦心為詩自其所長至於議論切當世之務制誥  
得王言之體賦序碑記未嘗苟作予每讀其書而愛之

恨不與之同時孰知後世揚子雲乃在吾先友中先友  
謂誰歟文閣待制桐鄉朱公也公世文儒年二十二登  
政和進士第是時人諱言詩公獨沉涵六義思繼作者  
南渡以來登館閣掌書命文章浸顯於朝中忤時宰謫  
居曲江十有四年昌其詩放厥辭益斥久窮極益自刻  
苦於山水間迨北歸則詩益老文益竒遂以名家其子  
軾等類公遺稿凡四十有四卷將刻而傳之屬予為序  
予謂公於牧之似之者三耽嗜佳句不工不已豈惟詩  
哉它文稱是一也仕皆至中書舍人職皆嘗歷史官以  
文華國儒者榮之二也牧之出典黃睦池湖四州公亦

守睦宣蘇等郡俱有惠政臨終各自誌其墓三也過之  
者亦三公事高宗玉音屢獎其文擢寘從班坐是被讒  
而去牧之爵位皆宰相進擬不聞親結主知一也公壽  
七十一牧之五十而已二也公之子若孫俱傳其家學  
牧之嗣雖為丞郎素業無聞焉三也某於公為年家  
子及與公款而知公詳因序公集併以是補公之家傳  
公諱翌字新仲慶元二年九月二十三日具位周某序  
王致君司業文集序

志氣不强不足以言文學問不博不足以言文司業王  
君吾能言之志氣强者也學問博者也故其文章瞻而

不失之泛嚴而不失之拘議論馳騁於數千百載之上  
而究極利害於四方萬里之遠其為歌詩慷慨憂時而  
比興存焉它文閱辨該貫直欲措諸事業所謂援古證  
今黼黻其辭特餘事耳既沒之十九年嗣子中行類遺  
編成二十卷求予為序君諱速字致君世家宛立生十  
有一歲當建炎戊申北虜破陳為其所俘轉徙河朔者  
十年戎馬中編簡蕩然僅得春秋左氏傳班固西漢書  
晝夜誦之一字不遺和議成間道歸其父尚書公於浙  
東父母兄弟相見已即提書入太學益從師友盡讀諸  
子百家日萬餘言遂擢進士第凡中原所親歷平昔所

講畫虜已在其目中又從知己視師荆襄然後南北形  
勝表裏洞達落筆輒數千言舉天下事如指諸掌孝宗  
竒之擢御史諫官將行其言旋出為二千石部刺史而  
簡注不衰迨淳熙四年為少司成選迂虜使方嚮於用  
年六十而卒其所抱負百未一究也予與君家契且舊  
每悲君之不遇既叙其文復紀其平生大畧如此後有  
君子為國惜才者必將嘆息於斯烏慶元二年十月十  
五日具位周某序

羣玉詩集序

新淦之下有市曰硤江直玉澗口陸行十五里至玉笥

山按道書以為羣玉山第十七太秀法樂洞天又為第八郁木福地漢武帝時遣使祈禱見白玉筭於壇上以是得名古有宮觀二十餘區以承天宮為冠在三會峯下本梅福舊壇五代號玉梁觀真宗祥符初賜今名宣和間陞觀為宮其右白雲齋又登臨之冠也方其盛時聚徒至三百人大觀庚寅不戒於火後雖葺治未復其舊且非傳籙之地故不能與閭阜爭長雄然山川閎麗仙真雜還則或過之有宣義郎楊扶圖南著實錄二萬餘言事為一門王宓德升賦詩三百餘篇：紀一事二君皆邑之名士其書同成於紹興之二十八年古迹備

矣今知宮事揚得清復刻自唐以來詩人題詠附益之凡好事者苟未能一至此山姑視三書猶將神游意想飄然起凌雲之志况於出入煙霞遨遊泉石之間哉得清益廬陵士族於誠齋待制為叔姪行作詩有家法求予一言故為提其要於卷首慶元三年七月 日平園老叟周某序

蘇文定公遺言後序

記諸善言孝子慈孫門人弟子之任然門弟子非一先後或不齊傳授或不審如元城劉忠定公於本朝故實洞達該貫無毫釐差而馬永卿錄造薰籠語猶以元豐

後官制為太祖時官則夫易知者尚爾况言之要德之  
與乎蘇文定公晚居許昌造道深矣避禍謝客縱有門  
人亦罕與言其聞緒論者子孫而止耳然諸子宦游惟  
長孫將作監丞仲滋諱籀年十有四才識卓然侍左右  
者九年記遺言百餘條未嘗增損一語既老以授其子  
即中君詡即中復以授其子道州史君森予嘗與道州  
同僚故請題其後昔人疑黃樓賦非出公手東坡蓋親  
為之辨今公自謂此賦學兩都晚年不復作此工夫之  
文至和陶擬古九首則明言坡代作識者當自得之又  
云讀書須學為文餘事作詩然公詩自工謂儲光義高  
處似陶淵明平處似王摩詰而以韓子蒼比之子蒼由  
是知名公素不作長短句今漁家傲一篇雖用禪語而  
句法極高乃知公非不能詞直不為耳此皆學者所宜  
知也惟公道德文章國有史家有集所學在古史所得  
在經解平生議論復載於此若予者何足以窺其端徒  
見公善者機而已慶元戊午正月乙卯

楊謹仲詩集序

文章有天分有人力而詩為甚才高者語新氣和者韻  
勝此天分也學廣則理暢時習則句熟此人力也二者  
全則工偏則不工、則傳不工則不傳古今一也同年

揚謹仲家世文儒才高而氣和於書無不讀於名勝無  
不師慕之嗜古如嗜色為文晝夜不休清江置郡今二  
百年二劉三孔以來文風日盛謹仲自少為先進所推  
未第時鄉之英俊爭受業於門名聞四方願交者衆二  
千石以下皆尊禮之益其行藝俱優而尤喜為詩本原  
乎六義沉酣乎風騷自魏晉隋唐及乎本朝凡以是名  
家者往、窺其藩籬泝其源流大要則學杜少陵蘇文  
忠公故其下筆初而麗中而雅晚而閱肆長篇如河江  
之澎湃浩不可當短章如溪澗之漣漪清而可愛間與  
賓客酬唱愈多愈奇豈所謂天分人力全而不偏者耶

諸孫光祖等既哀成若干首分為若干卷而門人高弟  
韋宜州楫又捐俸刻之其傳無疑矣謹仲諱愿五十餘  
方入官一為縣主簿兩為郡博士朝廷嘗以車輅院起  
之即上書請老轉通直郎家居累年賜服緋魚壽七十  
有九亦不可謂詩能窮人也慶元戊午正月

王推官洋漫齋文集序

龍泉在廬陵郡西幾三百里南與橫浦義柳接非四達  
之塗游客罕至故其人安分寡求非百貨所聚無富商  
大賈往來留遷故其俗純而不雜獨山幽水清實鍾美  
於秀民往、忘外慕而志不分專以文章致身殆與諸

縣爭長雄惟命有通塞故仕有顯晦其來尚矣英州推官王君諱洋字嘉謨自少力學負雋聲盛年冠大比謂宜摩九霄撫四海而命與時左困於場屋不得與鄉人之顯者同然其學術日富筆力日強譬之良農既勤蓄畬歲雖儉而家不餒又如良將自有方畧數雖奇而氣不衰平生著述三十卷號漫齋集其子棗孫三省索以示予：曰此吾故人之文也讀累日不能釋益其詩賦瞻縟集類精切詩話博雅長短句新清有以起人之心至於古樂府十篇皆推見本原然後遣辭辨蘭敗蠅二說則又用意至到直欲跂前修而及之是宜自一家而

傳之一鄉而布之它邦豈特為子孫之藏而已彼仕之達不達何加損焉棗暨三省拜曰請以是為序乃為之書慶元戊午九月十五日

曾南夫提舉文集序

太和曾寅亮出曾祖常平使者遺文四十卷屬某為之序某伏讀累日而歎曰此吾先大父秦國公元符庚辰同年進士也其何敢辭夫文亦多術矣以要言之學不富則辭不典氣不充則辭不壯才不高則辭不瞻三者一有長焉足以名家况兼之乎公自幼讀書五行俱下稍長徧抄經史傳記雖大寒暑未嘗輟著六經語孟老

子通論數千言凡聖賢蘊奧古今成敗無不究極下至  
星辰曆數皆為之說鄉先生劉弇偉明許可嚴甚每謂  
精博不可及其學何如也政和三年擢使益部中貴人  
鄧述市物無藝不如意輒焚之公疏其害民十事徽宗  
亟為斥逐廉訪王竦懼其并害已也誣公失察典吏受  
賕坐謫監當久之上思其勁直復起使兩浙湖南滋不  
改其操時禁舊學頌新義公作讀資治通鑑詩百餘言  
卒章有何當釋書禁新學破盲聾之句其氣何如也生  
終八年賦白鷺詩云外潔臨清流中貪魚鰕求人已駭  
伏甫中第蘇文定公歸自嶺南一見稱其邁往嘗登鎮

陽樓慷慨作賦欲追禦寇拉稚川睨燕山矧井陘馳太  
行涉滹沱其才又可知矣雖官止議郎年僅五十有五  
而其文之典之壯之贍者足以耀今而傳後由是觀之  
知公為不止矣公諱安強字南夫其父肅字溫夫山谷  
黃公宰鄉縣以清高處士目之生四子皆踐儒科仲安  
止著未譜五卷東坡蘇公所為賦秧馬歌者公乃其季  
也慶元戊午十月己丑

毛拔萃洵文集序

文者才也孝者行也全賦於天鮮矣制科時所重聲名  
世所貴天之與人又加鮮焉吉水毛洵子仁具此四美



付與厚矣而位止幕職壽終三十有二何其薄也同邑  
曾三異無疑博古樂善悼其屈於百年之後既哀遺文  
若干篇又錄名賢送行詩若干首仍纂其事實屬予為  
之序予曰貴為公卿而才行不稱壽至期頤而名聲無  
聞生赫奕於一時沒寂寥於後世者滔々皆是也子仁  
年雖夭仕雖屯而科名孝行俱載國史垂於無窮以此  
易彼未知其孰為厚孰為薄也仁宗實錄天聖九年御  
試選人書判拔萃科中者四人舉首李裕嘗歷理掾故  
改大理寺丞是謂京官子仁而下皆自主簿遞遷幕職  
雖同得邑猶選人也其告身曰承事郎者文散官也大

理評事者試銜也李燾仁甫長編併以為京官則誤矣  
又其父子皆得余襄公為之銘父守竇厥後歷倅三郡  
卒於江東當時吉州上其死孝不知何為繫之竇州實  
錄既云然仁甫遂從之大抵考證之學易差難精亦在  
乎秉筆者審之而已慶元四年十月具位周某序

平園續稿卷第十二 終

平園續豪卷第十三

周益文忠公集五十三

序二

陸子履嵩山集序

本朝文章至慶曆而盛歐陽文忠公實主夏盟學者一  
被品題往：名世當是時陸公子履乃與文忠周旋館  
閣詩文往復相與至厚其人抑可知已惜乎仕宦不偶  
陷於朋黨起而復仆：而復起晚遇裕陵自集賢修撰  
守河中召審官東西院方嚮於用則已老矣君子每有  
不遇之歎焉今其曾孫知蘇於公既沒百年之後兵火  
搶攘之餘冥搜博求僅得遺文十有二卷屬予為序將

刻而傳之予嘗歎尹師魯蘇子美江隣幾梅聖俞丁元  
珍皆著美名負屈稱與子履大略相似彼五賢者得文  
忠銘其藏序其文姓名鏗轟炳耀至今盪人耳目獨公  
以後死不得與於斯文或者遂謂公生既不遇其沒又  
重不幸也予曰不然公當古文復興時文忠實與為友  
其出倅宿州送以詩曰子履自少聲名馳落筆文章天  
下知開懷吐胃不自疑世路迫窄多穿機鬢毛零落風  
霜摧十年江湖千首詩又曰一自梅蘇閉九泉始聞東  
顏播新篇暮年酬唱尤多有怕逢詩敵力難當及敢期  
佳句報琅玕之句是則公之生也已為文忠所稱道如

此尚何待於身後其垂名不朽亦豈下於五賢哉予故  
表而出之公諱經子履其字洛陽人故以嵩山老人名  
其集慶元五年二月一日少傅觀文殿大學士致仕益  
國公周某序

趙訓之忠節錄序

功烈有大小死節無輕重惟能捐軀徇國則求仁得仁  
豈必論其功之何如哉國家自靖康後金賊蹂踐中原  
羣盜潰兵所在破城屠邑守官者奉頭鼠竄之不暇於  
此有人為視死如歸其為節也重矣當建炎三年歲己  
酉十一月隆祐太后自洪上顛護衛諸軍道有叛者改

犯吉之永豐皇族訓之字誨道以承議郎實為縣宰率  
弓兵拒戰力不敵遇害明年有司以聞特贈直秘閣仍  
官二子有女歸太和蕭氏奉其喪葬於盧源今七十年  
松檟鬱然女尚無恙其孫江州別駕彥楠捧檄來拜墓  
下既哀制詞史傳又以宗人吉州推官子琇所著行狀  
及諸公記跋共為一卷命曰忠節錄屬予為序予嘗觀  
書太史氏是歲有直龍圖閣令成守黃州城陷罵虜而  
死初贈右文殿修撰再贈徽猷閣待制隆興改元張忠  
獻公宣撫兩淮復用父老之言奏乞立廟遂賜忠顯之  
額今永豐終以君像附城隍祠殆闕典也按子琇及與  
君聯事而行狀成於次年其書隆祐南幸并君之死皆  
差一歲惟永豐志題名載君以二年至縣者是也其死  
在三年冬而叙君本末反云四年涖官則又誤矣夫當  
日之行狀邑人之紀次尚或訛舛况傳疑於後世乎雖  
然此不足辨也所以詳言之者使士大夫知同時宗室  
為守為令死職如此於以彰祖宗涵養作成之效豈特  
慰其子孫而已慶元己未四月

臨江軍三孔文集序

行有餘力則以學文聖人之言萬世是程或疑文行忠  
信之序是不然四科有先後四教非先後特因其材而

進德焉繪事後素不容紊也本朝人物至元祐而盛其兄弟傑然則有臨江之孔氏曰文仲字經父曰武仲字常父曰平仲字毅父先聖四十八代孫也居家孝悌行己謹信涖官敬事上忠其行美矣冠禮部冠國學登高第應制舉經自諫垣入詞掖常歷師儒掌內外制毅尤精史學更踐中外天下共稱其文號曰三孔今終百餘年而集彙散逸罕傳誠故郡之闕典也慶元四年太守濡須王邁實來政修教明瞻喬木而慕先賢既奠謁其像於學宮又博訪遺文而刻之雖曰存一二於千百然讀之者知為有德之言而非雕篆之習也總成若干卷

屬<sup>某</sup>以序昔太史黃魯直頌當時之人才有曰二蘇聯璧三孔分鼎張丞相天覺在元符中詆元祐詞臣極其荒唐謂兩蘇為狂率則剛直也謂公兄弟為濶疎則高古也夫魯直於蘇氏分兼師友天覺於眉山心伏其能皆以公兄弟配之文行何如哉若其出處載國史博雅具別著此不備書五年四月甲戌具位周某序

孫尚書鴻慶集序

大凡文人才士少之時屈首受書未能多閱天下之義理壯則從事四方志有所分及其老也血氣既衰聰明隨之雖有著述鮮克名家此古今之通患也其或軼群

邁往賦才獨異而復天假之年磨淬鍛鍊重之以湖山之助名章雋語少而成壯而益晚而愈精有若戶部尚書晉陵孫公益千萬人中特一遇焉公生於元豐辛酉當大觀政和間士惟王氏三經義字說是習而公博學篤志如韓退之謂禮部所試可無學而能者第進士冠詞科筆勢翻：高出流輩將及知命靖康倣擾為執法為詞臣旋由瑣闥歷吏戶長貳連守大邦其章疏制誥表奏往：如陸敬輿明辨駿發每一篇出世爭傳誦紹興而後遭值口語斥居象郡久之歸隱太湖上捨蠻蠻而狎鷗鷺去茅葦而友松菊於是繙北堂萬卷之鈔袖

明光起草之手默觀物化吟詠情性煙波萬頃納之曾次風雲變態日接於前如是二紀所得不可勝計毋恠乎筆端之哀：也天門劃開訢章上達論撰次對璽書繼下年雖耄老親為謝表至於宰執侍從臺諫則人致一啟各出新意其用事屬辭少壯所不逮又後十載當孝宗朝嘗命編類蔡京王黼等事實上之史官此與伏生年九十餘詔太常往受尚書何異是豈可以他人老少常理論也哉沒既一世其子興國太守介宗以書謂其曰先君文橐中更兵燼存者無幾而閩蜀所刻復雜翟忠惠之文大懼不足傳信今定為四十二卷其未備

者方哀次外集為我序之憶乾道丁亥遇公陽羨公八十有七矣論文之餘語及前朝舊事健論滔如洪河東注緒言纒如聚蠶繅絲屢更僕不能休然後知公非特文鋒不可當而老如趙克國猶善為兵也茲幸掛名集端因具列之近歲吏部侍郎葛公立方作韻語陽秋載東坡自海南歸公方髻亂坡命對衙門稚子璠璣器公應聲云翰苑仙人錦綉腸坡歎曰真璠璣也以公早慧固應有此然坡北歸實靖國辛巳公已二十一得非元豐乙丑自便還常公終五歲時乎所記訛耳鄉人既戶傳亦不得而略也公諱覲字仲益嘗以龍圖閣學

士提舉南京鴻慶宮故自號鴻慶居士云慶元五年十一月日

初寮先生前後集序

一代文章必有宗惟名世者得其傳天生斯人固已不數向非君師作而成之則其道不墜於地者幾希若稽本朝太祖以神武基王業文治興斯文一傳為太宗翰林王公元之出焉再傳為真宗楊文公大年出焉長養尊用風示學者雖間以剛直被排斥而眷顧終不少哀至於仁宗英宗神宗然後異才充滿中外其傑出如歐陽文忠公又逢時得政同心德於三朝閱八年之久相

與化成天下功不少矣故其門人高弟尤多惟東坡蘇公崛起西蜀嘉祐收以異科治平欲躡寘翰苑熙寧首待以國士及遇哲宗遂光顯於朝中間小人敲撼挫擣欲殺不果者天意也上賜也晚守中山尚書左丞王公世家是邦博學工文詞年十六即貢京師後二年坡至奇之公亦自謂得師也明年坡南遷不能卒業公尋登第闢初察於精舍日夜讀書著文年二十有七游五臺為竹林泉賦以將相喻泉石格高而意新送某曾大父詩云不論與汝小一月政自容君數百人專用吾宗公瑾伯仁事致推尊年德之意精切混成不類少作時方

諱言蘇學而公已潛啟其秘鑰久之徽宗旁求文士召寘館閣給札親試驟掌書命由中司入北門歷二轄其制誥表章詩文大率雅重溫潤而時發秀傑之語定功繼伐等碑睿謨曲宴百韻詩多出特命上恩與天通矣萬目睽睽徒謂其鶴鳴九臯而不知奪胎換骨自有仙手故未嘗以曲學指之今前集四十卷是也中興南渡四海名勝遷謫避地萃於湖廣而公壻趙奇子辟章又家之游夏大篇短章更唱迭和既已盡發平昔之所蘊且復躬閱事物之變益以江山之助心與境會意隨辭達韻過險而反夷事積故而逾新他人瞠乎其後我乃



綽有餘裕至於桂柳佛寺諸記閱深辨麗近坡暮年之作黃張晁秦既沒系文統接墜緒誰出公右豈止襲其裳佩其環而已今後集十卷是也初公與先大父同為元符庚辰進士政和中公典貢舉擢先公第二故公季子承議即辟綱及公孫刑部侍郎拒曾孫今邕守宗孟繼以集序為請久負諾責夫豈無說蓋公內制十八卷外制八卷李文敏公漢老實題其首且謂公天才英邁筆力有餘於文於詩皆瓌竒高妙無所不能用是序公全書所謂一言以蔽之者其尚何所伸其喙若夫本天人之相因考源流之所自以申叙累世之契好而告諸

來者則不敢辭也公諱安中字履道享年若干後學尊之曰初寮先生故以名集慶元六年二月日

續後漢書序

曹氏代漢名禪實篡特新莽之流亞丕方登壇自形舜禹之言固不敢欺其心矣今向千載好惡豈復相沿而蘇軾記王彭之說以為塗巷談三國時事兒童聽者聞劉敗則顰蹙曹敗則稱快遂謂君子小人之澤百世不斬茲豈人力強致也歟陳壽身為蜀人徒以仕屢見黜父又為諸葛亮所斃於劉氏君臣不能無憾著三國志以魏為帝而指漢為蜀與孫氏俱謂之主設心已偏故

凡當時祿祭高帝以下昭穆制度皆畧而弗書方且乞  
米於人欲為佳傳私意如此史筆可知矣其死未幾習  
鑿齒作漢晉春秋起漢光武終晉愍帝以蜀為正魏為  
篡謂漢亡僅一二年則已為晉矣興之名天寶命之是  
蓋公論也然五十四卷徒見於唐藝文志及本朝太平  
御覽之目逮仁宗時修崇文總目其書已逸或謂世亦  
有之而未之見也幸晉史載所著論千三百餘言大旨  
昭然劉知幾史通云備王道則曹逆而劉順本朝歐陽  
修論正統而不黜魏其賓客章望之著明統論非之見  
於國史近世張栻經世紀年直以先主上繼獻帝為漢

而附魏吳於下方皆是物也今廬陵貢士蕭常潛心史  
學謂古以班固史為漢書范曄史為後漢書乃起昭烈  
章武元年辛丑盡少帝炎興元年癸未為續後漢書既  
正其名復擇注文之善者併書之積勤二十年成帝紀  
年表各二卷列傳十八卷吳載記十一卷魏載記九卷  
別為音義四卷惜乎壽䟽畧於前使常不得追記英賢  
憲章於後以釋裴松之遺恨也昔周東遷浸以微弱  
至春秋時僅存王城而吳楚強大綿地數千里皆僭稱  
王聖人斷然以夷狄子之昭烈土地甲兵甚非周比興  
於漢中適與沛公始封國號同天時人事決非偶然孔

二頁  
前後  
鈔簡

子復生必有以處此乃為首探魏文當日之心次舉蘇氏百世之說以合習氏之論而證舊志之非作續後漢書序慶元六年庚申二月望

高端叔變離騷序

詩國風及秦不及楚已而屈原離騷出焉衍風雅於詩亡之後發乎情主乎忠直殆先王之遺澤也謂之文章之祖宜矣厥後宋玉之九辨王褒之九懷劉向之九歎王逸之九思曹植之九愁九詠陸雲之九愍皆九章九歌之苗裔自揚雄至劉勰則或反或廣或為之辨祖述摹倣不可勝數迄於本朝晁太史補之始重編楚辭十

六卷續楚辭二十卷又上起荀卿下逮王令集變離騷二十卷每篇之首各述其意本根枝葉備於是矣今高君元之復著變離騷九篇其友南康周令大受刻而傳之屬予一言予觀晁氏所謂變者言歷代每有所作其則愈遠如唐兵三變之變也君蓋汴流求其源由終復於初如齊魯一變之變也二者文同而旨殊君之上下序議論尤平正既不溢美亦不失實愍奇志等既續其詞亦循其義非深於斯道能如是乎故為推明之以俟知者元之字端叔武烈王瓊六世孫生以紹興壬戌苦學篤志假寐繩床不就枕者累年尤嗜春秋學嘗從科

月五公集 五國編和卷三 十一  
舉兩薦於四明有詩千篇大抵學廣而辭暢自號茶甘  
集死已二年席珍如此埋光不耀重可歎也慶元庚申  
四月旦

王參政文集序

儒生文士或不足於事業名卿才大夫於文辭又不屑  
為自西漢以來二者已難兼矣班固作儒林傳記二十  
七人丁寬以易名家為說至三萬言及景帝時乃為梁  
王將兵距吳楚號丁將軍與韓安國等俱有功固遂推  
為儒林之冠復於京房高相傳中一再稱將軍而不名  
以示別異蓋有深意存焉故叅知政事襄陽王公諱之

望字瞻叔生於羊杜成功之地慕其為人博學能文知  
略輻湊紹興八年試南宮蜀士孫道夫竒其文力白知  
舉請寘魁選位卑不見聽然亦名在第八十三年行都  
太學成高選學官明年以公為錄字郎兼博士坐閱五年  
每值談經同僚往：避席四方英俊爭求指授作為  
多其傑然如王詹事十朋皆是也便鄉求守荆門遂持  
節入蜀徧歷外臺以王官總軍賦適金虜渝平王師十  
萬攻取郡縣保守閔隘累月不解甲公與將帥議論往  
復費金穀鉅萬計而儲蓄衍素備蜀民不知為孝宗即位  
公出使九年矣官至太府卿而難其代詔侍從臺諫集

議於是特增置戶部侍郎升宣諭使留公於蜀某忝御  
史實發此議明年始還朝仍以版曹參贊都督府初見  
上奏疏二千餘言極論人主注治兵與臣下不同當如  
舜禹漢唐及祖宗所以奉承天意者援據經史開陳時  
事上大喜有大用意旋自銓曹直翰苑易諫大夫宣諭  
淮西措畫邊防講明軍政上益注意即拜參貳兼行右  
府時和戰未決衆論不齊僅三月除職奉祠而去眷倚  
殊未靳也起典帥藩超進資政殿大學士而公病不能  
興矣其季子鉛通敏好學念公遺文刻於蜀者訛舛特  
甚手加編校定為漢濱集六十卷謂某之先大父與公

先正為同年進士以序見屬惟公學根於經故有淵原  
文適於用故無枝葉奏劄甚多皆可行之言內制雖少  
得坦明之體酷嗜吟咏詞贍而理到嘗游大峨賦長韻  
與客賡和至六七篇下語如珠之走盤用韻如射之破  
的其他著述大率稱是近世論文章事業公實兼之豈  
與夫一偏一曲之士校短量長而已惜乎時雖逢而未  
能盡其才位雖高而不能久其任後之人讀公之文尚  
可以想見其人而秉筆太史氏者亦或有攷於斯焉慶  
元六年四月日序

陸氏翼孟音解序

八卦畫而萬象分此文字所由作也自五帝迄戰國雖  
六書之法形制或異然篆籀猶存未失本意秦便末俗  
始改散隸後世益以譌謬傳寫六經論孟間改舊文而  
諸儒用今字為注解因今韻立音訓道隨說隱義逐時  
晦為不少矣韓退之云凡為文辭宜畧識古字故寶蓄  
科斗孝經及漢衛宏官書以為依據奈何後之人不復  
致意於斯也臨川陸嘉材諱筠一字元禮博習修絜登  
紹興乙丑進士第不汲汲進取惟盡心於所蒞初主貴  
溪簿闢邪說而正官廨王右史洋為之記厥後魔賊焚  
縣相戒獨留簿廳其感人心如此仕至朝奉大夫浙西

安撫司叅議官賜服金紫享年七十有六平生篤志孟  
子著翼孟音解九十一條擇春秋左氏傳莊列楚詞西  
漢書說文之存古文者深思互考遂成此書如以折枝  
為磬折腰肢讀樂酒若樂山樂水角招為韶眸子為牟  
殺三苗本作竅二女果本作媠之類皆粲若白黑至論  
舜生於諸馮遷於負夏卒於鳴條視漢儒所記檀弓蒼  
梧之語孰近孰遠孰信孰疑此古今學者議論所未及  
也且舜居河東歷山雷澤各有其地而越人別指歷山  
舜井象田仍以餘姚上虞名縣風土記曲為之辭人不  
謂然蓋異端之作其來也久於舜平居附會已類此况

身後乎所謂九疑之葬二妃之溺宜退之黃陵碑云皆不可信彼孔安國解書以陟方訓升道其說尤拘書固曰升高必自下陟遐必自適陟豈專訓升乎然退之近捨孟子而遠引竹書紀年何也予每歎恨不得質疑於韓門而喜嘉材嗜古著書有益後覺藏其本殆三十年今嗣子新融水尉孝溥追叙先志請題卷首始為推而廣之昔唐彭城劉軻慕孟子而命名著翼孟三卷白樂天記其事賴以不朽嘉材視劉何愧特予非樂天比其能使嘉材不朽乎慶元六年四月戊戌序

平園續稿卷第十三終

平園續稿卷第十四

周益文忠公集五十四

序三

澈溪居士文集序

孔子曰君子疾沒世而名不稱惟有其實則名從之是不可求也雖然賢如夷齊學如顏淵皆得夫子而名益彰彼身居巖谷砥行立名非附青雲之士湮沒無傳者多矣此司馬遷所為深嗟而屢嘆也朝奉大夫廬陵彭公諱醇字道原生而穎悟六歲時賦中秋不見月詩有警句自是以詞章經術馳聲鄉閭年三十一登第嘗攝行臨川靖安二邑已而令石首令湘陰守康守賀守南

安所至儒雅飾吏在循良之日垂七十納祿而歸自號  
定庵又曰卧雲翁有澈溪居士集五十卷議論平正如  
其為人今四世孫鄉貢進士叔夏既譜公出處姪孫信  
州永豐主簿汝翼復裒遺文於兵火之餘得二十卷求  
序於予共惟本朝元祐以來人才盛矣忠言正論著於  
籍者三百九人極天下之選頌之即國載之國史垂之  
萬世而公姓名在焉則公之賢為何如六一先生之後  
文章莫如東坡時人或得一語終身榮之考前後集答  
士大夫啟終四十篇而獲麟騎箕之歲回賀州啟在焉  
既曰賜以尺書借之餘論又曰溫辭下逮陋質增華則

公之文為何如凡孔子之所言太史公之所歎公一無  
憾託名不朽尚何疑焉况叔夏與其兄叔夜皆有文行  
而汝翼及其弟瀏陽尉夢弼以家學同榜登科又將立  
身行道揚名於後世斯文也豈特如孔悝鼎銘稱其先  
祖之美而已嘉泰元年三月辛未

杉溪居士文集序

登文章之籙固難矣詩於其中抑又艱哉劉夢得曰心  
之精微發而為文之神妙詠而為詩司空表聖亦云文  
之難而詩尤難又嘗喻以飲食不可無鹽梅而其美常  
在醎酸之外之二說前輩有取焉古者造士以四術教



子於過庭皆以詩為首本朝蘇氏自編東坡前後集亦先列詩篇其所從來遠矣今杉溪居士劉公殆有得於斯歟始予少時聞公賦詠一出輒手抄而口誦之味清江引則欲進乎技而凝於神歌出塞行則如視旗影而聆鼓聲也讀大堤曲長相思則又如望歸舟對斜月而聽情人思婦之語切切也其他摹寫物象美今懷古登臨比興酬贈祖餞皆凌厲乎先賢度越乎流輩蓋得於天者氣和而心平勉於己者學富而功深故於所謂至難者既優為之則其制誥有體論議有源銘誌能叙事倡頌多達理固餘事也藻飾王度冠冕諸儒領袖鄉黨

有以也夫公諱才即字美中世居廬陵年二十四大觀三年釋褐甲科宣和初復中詞學第二兩登館閣一掌外制再直翰苑仕至工部侍郎兼權吏部尚書丐歸優進顯謨閣直學士奉祠卒於家年七十二其孫承議即恪類公集為二十二卷授其子國學生千齡至是以序為請故為追述見聞而題其端杉溪公自號也嘉泰元年二月旦

漢兵本末序

臨江自三劉有功漢史其學盛行今徐筠孟堅既為漢官考四卷季天麟仲祥又惜司馬遷班固不為兵志於

是究極本末類成一書注以史氏本文具有條理凡中外諸軍若將帥之名與夫賞功罰罪繇戎簡稽兵器馬政參互討論略無遺者數請予序其意予觀周禮雖分六職而小宰以官府六聯合邦治每措軍旅於祭祀賓客七事之中司馬名為治兵多及坐作進退而徒役旗常車甲之屬散於六官大師用齊之禮乃在宗伯後世趣便一時古制遂止人徒知井田一壞為四民之害而不知興衰治亂舉出於兵此邦家之害也人徒以開阡陌罪秦而不知變內政以作備者齊也蓋古者卿大夫家曰百乘諸侯國曰千乘天子則曰萬乘始於四立為

甸：有戎馬有兵車有牛有甲士有步卒是以師田共務文武同方漢承秦後兵農幸未全分如欲復古猶易為力至武帝窮師黷武加以橫斂其又奚言國不足於兵將每難其人有自來矣予故因漢氏之失策及先王之遺意使學者有考焉嘉泰元年二月既望

### 求齋遺稿序

慶元戊午春永豐鄒傳之年十有九袖書過予謂堯時教化已明雖康衢小童擊壤老農歌謠皆可傳誦况於卿士其樂之和上儀飛鳳下舞走獸况於烝民予異而禮之自是數相過每切於師友問諸鄉人皆言傳之資

質早成積學勤篤十三作祭叔祖文十五作登山賦語  
多老蒼十六七時從儒先曾丰幼度邑宰黃景說巖老  
講習詩文復侍族伯約禮文範官永嘉因游葉適正則  
之門歸作求齋記大槩欲自求於內收放心於外又論  
顏子之樂惟在博約藻繪組織何有哉用志如此予方  
期之遠大忽以疾苦亟饋之藥遽以訃來是可惜也它  
日其父自哀遺稿四帙丐題其端蓋傳之於六經尤好  
讀易有繫辭說一卷評論史漢名臣及詩賦記序箴銘  
雜說皆出入經傳推尋義理而舉業亦不廢也予聞李  
觀元賓第於貞元壬申明年中詞科又明年：二十九

卒韓退之為識其墓厥後李漢編韓集凡銘誌十二卷  
近七十篇乃起於元賓由是文行益章今傳之財二十  
一耳加以數年進而不止豈減元賓而未霑一命僅存  
遺書時無退之誰能取信姑詳述本末少塞其父之悲  
云嘉泰元年二月二十日序

仲并文集序 辛酉夏

江都仲并彌性自少卓犖不群潛心問學力排王氏一  
偏之說惟六藝孔孟是師筆勢翻：雋聲籍甚紹興壬  
子擢進士第高宗方汲：人才歲在甲寅丞相勝非執  
政松年與一二侍從相繼薦對上一見褒賞特改京秩

詞臣王居正草制云學知是非邪正庶幾孔子所謂可與共學者當是時人之期君之自期皆謂公卿可立至或疑年少資淺宜試以事補外而去後三年丁巳丞相浚執政與求守與義復以名聞召至闕而樞密使檜頗不謂然君即移疾出倅京口自是棲遲間退者二十一年孝宗初元擢丞光祿晚知蘄州議論才畧既未盡見於用而平生著述亦多散失外孫南安太守孟猷嗜學好修淵原有自哀成浮山集十六卷以序見屬予婦家於君有連且嘗同朝熟其才華故樂為言之夫文體衆矣吟詠情性莫重於詩仕塗應用莫急牋啟詩也者造

意深則辭或齟齬次韻多則句或牽帥君之古律如王良造父馭駿馬駕輕車有犇軼絕塵之勢其賡險韻如繭抽絲印泥愈出愈新送妹長篇孝友慈愛溢於言外殆欲上規風雅一何盛也其四六叙事雖閎肆而閎鍵實密對屬雖切而非駢儷所能拘最後蘄州謝上表以古文就今體自成一家凡為國撫民據舊圖新之意無愧前哲此由學廣聞多非特天才駿發而已其他論時事條利害深切明白務在可行為莊安常行狀見謂三長雜著題跋清雅可愛復以餘力出入釋氏游戲歌詞無不逼人夫其才學如此幸早為君宰所知而不得

雍容禁省歌頌大業其命也夫雖然裕於才者薄於命  
文士常然獨君子哉姑詳著以釋南安凱風寒泉之思  
云

程洵尊德性齋小集序

自元祐間蘇文忠公有詆伊川程氏之語門人怨怒力  
排蘇氏由是學問文章遂分洛蜀識者非之紹熙甲寅  
予自湘中歸廬陵有錄事參軍婺源程洵允夫袖長書  
及所業一通相遇合蘇程為一家心竊異之已乃知其  
於朱熹元晦為中表自其先世相與講學又酷嗜眉山  
之文為三蘇紀年十卷間以示予凡其父子出處詩文

先後前輩議論之所及編纂畧盡未幾洵以病卒官後  
累年其宗人法曹萬里出君尊德性齋小集一編合古  
律詩百餘篇記序書銘各二跋四說一誌表行狀祭文  
叙事劄子五表啟五十一大抵議論正平辭氣和粹益  
嘗記其師里人李縉之言曰道有遠近學無止法不可  
見其近而自止必造深遠然後有成此程氏學也又曰  
文以載道物有是理辭者達是而已此蘇氏學也君之  
所得實本於縉學者果可無淵原乎惜夫父困塲屋五  
十由恩科入官主簿衡陽一轉而止不得發聞於世子  
故序其書以告來者

帝王經世圖譜題辭

漢司馬談父子貫穿經傳馳騁古今謂當時六藝已千萬數故有儒者博而寡要勞而少功之言唐韓愈文不絕喑編不停披然亦記事提其要纂言鈎其深矧去古逾遠衆說日繁才學未迨於前賢宜其用力勞而見功微此圖譜所由作也雖然分門類事者固多其能旁搜遠紹合異為同則鮮矣金華唐仲友字與政於書無不觀於理無不究凡天文地志禮樂刑政陰陽度数兵農王霸皆本之經典兼採傳註類聚羣分旁通貫使事時相參形聲相配或推消長之象或列休咎之證而於

郊廟學校畿疆井野尤致詳焉各為總說附其後始終條理如指諸掌每一篇成門人金式輒繕寫藏去積百二十有二篇又得與政猶子燁別本相與校讐釐為十卷以類相從會分教廬陵將鏤板校官而郡守趙侯善鑿助成之屬予題辭夫水之流東惟海是歸車之指南其塗不迷今是書折衷於聖人示適治之路故名曰帝王經世圖譜非其他類書比昔漢儒專通一經仍守師說居家用以修身蒞官取以決事况乎六經旨趣百世軌範皆聚於此學者能因廣記備言精思博考守以卓約則它日見諸行事豈不要而有功也歟與政名臣子

少登兩科歷祕書省正字著作佐郎出知信台二州擢  
江西提點刑獄孝宗深知其才不幸得年僅五十三凡  
所蘊蓄百未究一予每與士大夫共惜之因序其書併  
告來者嘉泰元年七月日前進士周某書

曾氏農器譜題辭

紹聖初元蘇文忠公軾南遷過太和邑人宣德即致仕  
曾公安止獻所著禾譜文忠美其溫雅詳實為作秧馬  
歌又惜不譜農器時曾公已喪明不暇為也後百餘年  
其姪孫耒陽令之謹始續成之凡耒耜耨鋤車戽蓑笠  
鉸刈篠簣杵臼斗斛釜甑倉庾厥類惟十附以雜記勒

成三卷皆考之經傳參合今制無不備者是可補伯祖  
之書成蘇公之志矣其叙牛犁蓋一編之館鑄予嘗學  
稼因演其說山海經曰后稷之孫叔均始作牛耕世以  
為起於三代予謂不然牛若常在畝畝武王平定天下  
胡不歸之三農而放之桃林之野乎故周禮祭牛之外  
以享賓駕車犒師而已未及耕也不然牽以蹊田正使  
藉稻何足為異乃設奪而罪之：喻耶在詩有云載芟  
載柞其耕澤：千耦其耘徂隰徂畛又曰有畧其耜俶  
載南畝以明竭作於春皆人力也至於獲之積之如墉  
如櫛然後殺時犉牡有秣其角以為社稷之報若果使

之耕曾不如迎猫迎虎列於蜡祭乎厥後王弼傳易以  
為稼穡之資宋景文公初闢之曰古者牛惟服車書肇  
牽車牛易服牛乘馬漢趙過始教牛耕蓋本賈思勰齊  
民要術予謂輔嗣固失矣賈氏及景文亦未為得也按  
論語子謂仲弓曰犂牛之子騂且角雖欲勿用山川其  
舍諸此聖人格言也蓋犂田之牛純雜牝牡皆可祭牛  
則非純非牡不可故曰騂且角也注疏乃以犂為雜色  
騂為赤純色角為周正近世諸儒並從此義今觀周禮  
牧人時祀牲必用牲：純色也外祭毀事用龙：雜色  
也是則純雜之辨也封人設其楅衡魯頌夏而楅衡白

牡騂剛是則言角之意也竊疑耕犂起於春秋之間故  
孔子有犂牛之言而弟子冉耕亦字伯牛彼禮記呂氏  
月令季冬出土牛示農耕早晚賈誼新書劉向新序俱  
載鄒穆公曰百姓飽牛而耕暴背而耘大率在秦漢之  
際何待趙過特教人耦犂共二牛費省而功倍爾易傳  
出於魏晉第見牛耕不復考其初而賈公彥考工正義  
遂謂起於後漢其失尤甚然則山海經果荒誕歟曰班  
固藝文志山海經十三篇而劉歆所校凡三十二篇定  
為一十八篇固已不同歎又云出於唐虞之際今考史  
記以不窋為稷子譙周已謂世代不合况叔均乎故無



錫尤衰定為先秦之書非夏禹及伯翳所作甚明其在春秋之後無可疑者世人習熟見聞多惑是說予之謔諄亦可哂哉若杞之屬揚雄方言往三名耒陽既書之矣遂使它日枚舉名物採方言而附之非所謂後世復有子雲者耶嘉泰辛酉八月

曾無愧三英南北邊籌序

高宗南渡之初北虜方強未暇弔伐士大夫日夜為防守江淮計是時右正言呂祉獻言最切後以直龍圖閣帥金陵遂與僚屬吳若陳克著東南防守利便三卷上之事既詳實文亦條暢蓋若克皆文士而祉則以功名

自許者也紹興辛巳完顏亮叛盟明年孝宗即位銳意恢復不但守淮防江時則有尚書郎臨川吳曾著南北征伐編年二十三卷起三國終五代凡古今形勢師旅勝負該貫無遺仍集當時君臣議論為分門事類一十二卷其相謀相應攻守通好可指諸掌視祉之書益加詳焉今臨江曾君三英復為南北邊籌十八篇南之攻北其事有九諸葛亮紀瞻褚裒溫劉裕宋文帝陳顥達沈慶之吳明徹是也北之圖南其事亦九曹操魏明帝羊祜苻堅拓跋太武孝文元英邢巒北齊是也人為一論：指一事皆援昔以證今因跡以求心即成而究

敗考古可謂勤而用志可謂切矣它日上之樞庭必有  
運良平之籌者傳之良將必有合孫吳之法者苟非其  
人道不虛行豈特刻舟記劍按圖索馬而已哉嘉泰元  
年二月旦

張良臣雪窓集序

富貴繫乎天一定不能易安之可也詩文則不然盡心  
力而為之期至乎古人乃止耳雖然天之降才正自不  
同孟窮苦纍：韓富浩穰：宮商合奏斯有取焉襄邑  
張良臣字武子家於四明篤學好古擢隆興進士第日  
從魏南夫史直翁二丞相游仕宦二十餘年他人朱紫

君困青衫他人鍾鼎君樂簞瓢方二公薦士如林君芒  
屨藤杖日與高僧逸人往來蓮社間不復以名為意淳  
熙末始管庫行都則又蹇驢破帽苦其心志於灞橋風  
雪中朝士稍：知而愛之僉謂宜掌故六曹馴致館學  
予間兩社有意啟擬而君病不可為然後知二公前日  
遺君者命也命乃在天無可奈何孰使君憊心疲精晝  
鍛夕鍊自苦於吟詠欲效陳無已之簡古呂居仁之淡  
泊至於古賦樂曲又將推而上之忘其心力之艱勤此  
豈非天乎後十五年君之弟堯臣裒古賦四篇古律詩  
數百首號雪窓集介友人曾三異屬予以序嗟夫富貴

不可致君固安為擇術復自苦有郊之窮而交游無韓  
之富相和成音天之與人兩不相遇予誠憐而悲之故  
為詳記本末堯臣亦工詩殆所謂二難者耶嘉泰元年  
十二月日

忠正德文集序

高宗中興用宰相十五人曰忠曰正曰德曰文兼而有  
之者其惟趙公元鎮乎此非私言高宗大書賜公云爾  
方建炎三年車駕巡幸江浙內外多故公初為尚書郎  
上已用其言罷王安石配享俄被簡擢歲中歷司諫殿  
中侍御史遂為中丞上語范宗尹云鼎在言路極舉職

所言四十事已施行三十有六蓋祖宗初除言官即置  
簿載所言事日考多寡當否已行即朱銷其下外庭未  
必知也先是政和以後爵賞日輕公請惜名器抑僥幸  
諸將恃功恣橫劉光世部將王德至殺韓世忠之將陳  
彥章而世忠亦躬率部曲攘金陵守連南夫府解公攝  
德鞠於臺中累疏乞正世忠罪悍將稍知畏內侍馮  
益挾舊恩詬張俊公極論其橫卒斥逐之遂以忠正進  
登西府坐沮辛企宗節鉞補外暨入相明元祐臣僚非  
辜薦任申先張燾范冲朱震王居正等布列清近一洗  
章惇蔡京王黼輕用侍從之弊虜震合淝決策親征江

淮庶定復還臨安皆身任安危慮無遺策蓋公解梁人  
氣節端方學術純正筆力又過於人凡處分軍國機務  
多其視草然後御劄付外惟德與文又孰加此當是時  
邪正洞分紀綱大振國勢日尊指期恢復適恩平郡王  
出閣封拜與孝宗一等公請稍示降殺同僚讒間遂行  
罷政之後繼以南遷言者每指公不主和議而公平居  
未嘗有一偏之說也高宗更化復特進觀文殿大學士  
孝宗繼志賜謚忠簡又贈太傅追封豐國公侑食高宗  
廟廷擢用諸孫惟韞暨謚為郎為監為部刺史二千石  
寵靈焜燿已歷三朝公論既伸九京可無憾矣某嘗讀

唐史李德裕傳愛其上丹宸六歲禁止戚里請求奏停  
盤條繚綾忠言正論著於中外及大用則欲尊朝廷肅  
臣下政出宰相挾術詭時以進者每闕之不使中人監  
軍掣諸將之肘用兵伐叛詔書付宰司乃下處報機急  
武宗必命德裕起草與公事業如出一揆其最可異者  
德裕自分司東都貶潮州司馬公奉祠四明以散官安  
置於潮德裕明年貶朱崖司戶而卒公亦移置其地薨  
焉得年俱六十三始終相類復如此豈後身歟始公謫  
潮之人敬愛不忘天道好還謚今來守茲土追懷祖烈  
將刻遺橐附昌黎文以傳凡擬詔百有十雜著八古律

詩四百餘首奏疏表劄各二百餘篇號得全居士集而以樂府四十為別集屬某題辭某按國朝故事眷待故相多賜嘉名揭碑首或二字或倍之公之生也幸拜宸奎褒稱四美某已敷衍於前矣盍就以名集昭示萬世視碑額庶有光焉謚曰諾哉是為序嘉泰元年臘日

撫州登科題序

大江之南分東西兩道自東而西首曰撫州其為郡在三國孫氏至隋唐雖易置不常然今建昌軍治南城統南豐入閩為邵武軍本皆撫之屬邑非特地大人庶冠冕一路而文物盛多亦異它邦本朝最重儒科臨川圖

志載題名記一卷起太平興國五年樂史而下至淳熙七年姓名具焉今州學教授富沙劉填填將增廣刻之石使來者可繼而郡人太學博士王克勤士子涂公達見屬題辭夫為己之學垂世之文固不專為祿仕計然拔起耕釣今異乎古特招舉辟又置不講士進德修業懷才抱藝大欲平治天下次將黼黻斯文捨科舉安出哉是以二百餘年間賢達相望試言其顯者晏元獻公之進賢好善王文公之文學行誼曾子固輩之主盟斯文此一身所當勉也樂氏曾氏王氏父子兄弟相繼策名此一家所當勉也名士如謝逸與其弟邁學術淵原

砥節礪行嚴場屋而捨之肆其孫源曾孫樞繼預黃甲  
蓋不在其身必昌厥後此又一鄉所當勉也若乃汪革  
以奇才冠南省陳孺因版授遜大魁是皆傑出人上者  
後生得不思齊乎迨乙未歲羅點廷試為榜眼劉克夫  
釋褐魁上舍克勤由童子舉入館閣是又盛事參集者  
諸生得不踵武乎凡此五者有美有勸教官作成之意  
深矣克勤再第進士公達之先由元祐至今登科者十  
餘君於此尤憐之故嘉其志併及之嘉泰二年二  
月旦

張文靖公文集序

德之盛者必有言之文則行也遠肇自帝王之世臯  
陶邁種德尹躬享天心即其人也昔者孔子定書舉臯  
陶矢厥謨於三謨之首虞帝之歌至於一再而伊訓咸  
有一德太甲上中下十有餘言並載百篇之中以其可  
為萬世法也揚雄漢儒之傑然者嘗賦甘泉稱頌人主  
搜逮索耦豈無他人獨曰臯伊之徒冠倫魁其深知聖  
人之意也歟後世文士平居道古今官達掌制命論議  
於侍從訄謨於廊廟暇則作為歌詩以寓比興體雖不  
一要皆出於謨訓然德有差等言有精粗其傳久近亦  
必隨之若參知政事毗陵文靖張公殆有德之言行遠

之文也初以經明行修發為詞章連中科第馳聲四方  
在高宗時為名御史掌內外制遂踐二府上以端人正  
士目之大詔令多出其手陳善閉邪拔賢引類功不少  
矣再貳國鈞垂登宰席方且逡巡退避或入侍經筵或  
出典大藩雖權臣專國勲業不容盡究而文集五十卷  
奏議二十五卷盛行於時今公之孫戶部尚書抑學世  
其家數請為序某固嘗考公之德誦公之文知其學術  
本原乎臯伊謀猷遇合於虞商蓋中興人物之冠冕也  
敬題卷首以補任昉文章緣起之未備云公諱守字子  
固一字全真其出處事業則有故相張忠獻公誌銘在

嘉泰二年九月

王氏濟美集序

大名王氏有諱言者唐末起家令黎陽子徹仕五代為  
左拾遺是生晉國公以雄文厚德為藝祖簡知擢監察  
御史選守鄉邦有畫錦之褒嘗植三槐於庭期後人之  
興太宗朝仕至兵部侍郎知開封三子長祕書丞終袁  
州太守次丞相魏國文正公也季知應天府孫魯繁衍  
為宋大家淳熙六年黎陽八世孫知信州諱從系出祕  
丞稽其族屬自晉公三子派別枝分曰世系曰世譜又  
為槐庭雜記宣陽因親錄以授其子淹二倅廬陵既刻

其曾祖諱震元豐懷遇集請予為序又哀晉公以來史傳銘誌前賢紀述先世遺文總為十卷號濟美錄而以文正子懿敏公所纂遺事及懿敏子鞏雜記三編與其父書併為一集而刻之自廬陵擢守筠州將再刻以廣其傳復屬予以序粵自周哀賢者之類棄功臣之世絕故孟子告齊宣王以故國非喬木王無親臣矣蓋諷其上也雖然有位於朝不守其業而忘其所甚至公侯之家降在皂隸則華門圭竇得以陵之此豈獨上之人罪也哉今筠州父子不隕世業以貽厥後其賢於人遠矣初文正公以大理評事宰岳之平江圖經載二事其一

公將至山鬼避舍是特識公之貴勿書可也而國史揚文公誌墓乃備書之其一死囚當論公通夕不寐思所以為計五鼓有叱直更者起云相公將出廳須臾公果出囚竟未減民懷德政至今奉祠而傳與碑反不之載予故特書之使後人知公仁心陰德肇於為邑况秉均乎居官者勉以為法則王氏之昌與淮水俱長何但三槐蔽芾於堂而已嘉泰二年閏十二月

芮氏家藏集序

夫子曰有德必有言謂其和順積中英華發外也今於吳興芮公見之公諱燁字仲蒙一字國器孝弟忠信博



習修絜登第後每有慷慨憂時之志鄉里前輩如劉一止沈玠諸賢皆敬愛之紹興末高宗將內禪殿中侍御史蜀名士張震以名聞高宗曰是能古文者即日擢監察御史已而出入中外為孝宗深知許以侍從兩朝眷遇蓋如此不幸自司成移疾而終年纔五十八予在從班與六曹長貳給舍相與悼歎共為奏云伏見故國子祭酒芮燁德配前修文高當世恂自守未嘗與物競及當官而行則秉誼据正有不可奪之志故相秦檜時鄉人沈長卿作牡丹詩有許以為謗訕者引燁為證廷尉捕治燁力辨其非長卿不任管掠親書証伏獄吏以

示燁曰長卿証伏則可燁豈敢証證吏別擿燁尉仁和時所作詩有今作塵埃奔走人之句坐以怨望及應言上不言上遠竄武岡畧不自明公道宏開收寘臺省已而出使東廣節操彌勵凡舊例供饋積至數千緡潛輸公帑歸過曲江班犒郡縣吏之乏月給者和不違衆清不近名大率類此陛下自司業升之祭酒知其經明行修諭宰臣云侍從闕亟用之會燁請祠優進右文殿修撰兩學生員祖道千計觀者太息按燁初除司業在乾道五年八月家居一昔可至是時官已員即供職滿歲則六年冬祀法當任子燁逡巡踰時乃起遇郊不及

者兩句又按祭酒從四品序位太常宗正祕書少列之  
上燁疾未革少留累日必遷不然休致遺奏亦官二子  
而燁前緩其來後果於去為子孫計者肯如是乎願錄  
衆美還其恩數使天下知聖朝尊賢厲俗不間存沒書  
之史冊足勸廉遜非創與也衆皆稱善惟公同年生給  
事中者難之衆自欲上奏或曰銀臺異論如格詔何衆  
惘然而止其後上念公不已用其弟燁為八座公之諸  
子遂有入官者此非天子始予為學官館職史官御史  
皆未煖席公輒繼至為正字也公有呂度贈刀之夢暨聞  
公訃予復夢作文祭公覺而記其四句曲盡公德云君

子所恃而亦不比小人所畏而亦不忘此殆神交也今  
公子邵武太守立言上高宰及等哀公易傳一卷詩四  
卷奏議二卷表啟書劄論策記序雜著長短句共七卷  
屬予為序惟公博通諸經尤長於易坎之象曰君子以  
常德行習教事人多以治已治人為說公獨曰坎惟素  
習則在險不失其常險至方習亦復何及故初爻獨云  
習坎它爻曰坎而已雖然習當出險乃復入於坎窞者  
為陰柔小才設也其論離卦九三曰日中必昃人生必死  
當如曾參易簣子路結纓怡然死生之際嗟則惑：則  
凶矣即二者考公平生所謂非苟知之亦允蹈之者歟

至於他文正大而辭達詩篇醇粹而味永皆有德之言也予故首陳兩朝聖鑒次列侍臣公論然後記予與公親厚本末如元城劉忠定公序丞相忠肅公集過於詳云嘉泰三年正月

平園續藁卷第十四終

平園續藁卷第十五

周益文忠公集五十五

序四

齋說

堂庵說

字說附

沈氏論語解序

揚子曰聖人之言遠如天賢人之言近如地易更三聖詩書禮樂春秋皆刑定筆削於夫子之手此聖言也孟荀揚韓發明經訓羽翼治道此賢言也兼是二者其惟論語乎蓋齊家治國立身行道夫子平居形諸言者如三辰著明有目咸睹莫知所以明如四時運行無物不遂莫知所以行非天乎門弟子或求益或質疑往來指事而請譬之山川有定體高深猶可度草木有定形名

物或可辨非地乎是誠五經之館鑄六藝之喉衿學者如欲時習聖賢之言捨此何以哉吳興沈文炳字堯文家世儒者少有聲國學養親不仕惟留意於是書其子數抱遺編求予一言易不云乎仁者見之謂之仁知者見之謂之知亦資道以盡吾之分而已其視作無益而攻異端者益相萬也嘉泰壬戌臘日

吳康肅公芾湖山集并奏議序

才氣可以任事而以學術本之未有不為名臣者也龍圖閣直學士天台吳康肅公以進士起家受知高廟爰及孝宗在內為御史歷吏戶禮刑少常伯給事中又嘗

典治內史在外則五為帥守處劇繁以平易其才氣何待言至於履正奉公仁民愛物如嗜飲食發為詩文身簪紱而心立壑此則學術之力也其子嘉興太守洪衷公遺文號湖山集二十五卷長短句三卷別集一卷奏議八卷遠來謁序予與公同朝久知公熟公雖志在功名而議論專以恤民為主復躬行之自非才氣學術兩皆有餘何以臻此當乾道庚寅公帥豫章胡忠簡公邦衡以泉守予以閩憲俱入奏事過焉燕集款甚將別各為二詞以送備載集中自是力請奉祠繼以掛冠享林下之樂者十有六年其詩詞益多意遠而辭達使人讀

之蕭然有出塵之想予嘗評公侍從如嚴徐彈壓如趙張循良如龔黃止足如廣受凡西漢名臣殆可兼之然尚有一說始紹興甲子六月以祕書省正字輪對奏江浙昔號粒米狼戾雖歉歲斗直二百今歲豐反倍之蓋由州縣重征稅監官覲美賞巡攔利掊取若蠲其筭價自平矣高宗大喜七月有旨從之仁言之利其溥如此當路忌其直諫是月出倅括蒼予為祕書少監得此事於日曆厥後上用公執法主計豈徒然哉勅局編類紹興寬恤詔令載之七十一卷之首例曰臣僚奏請當時士大夫固未知出於公今奏議復不載予故特書之以

彰高宗愛民用人之美意且明儒術可富天下之大端云嘉泰三年五月日具位周某序

黃簡肅公中奏議序

子路問事君夫子曰勿欺也而犯之大凡誠動於內乃形於言一或欺焉雖復犯顏敢諫不足觀已端明殿學士簡肅黃公負正心誠意之學初奉廷對後為王邸教官晚領儒宮貳祕書歷工禮兵部長貳兼給事中見於職守發為議論始終不叛所學故其出使也虜欲渝盟他人曰否公則先事言之其議禮也他人未免從權公獨據經守正當路或不悅而高廟深知之擢寘侍從尤

月益公集 五國編和卷十五 三  
為孝宗眷禮故事近臣去國除職縱高鮮有過舊班者  
公以權尚書奉祠乃加真學士以寵之得謝之後遣使  
持親札訪天下利害朝政闕失進職祕殿加賜金縷公  
亦有犯無隱畢陳所蘊易箒之際猶手疏大事以聞事  
君不欺益優為之既葬朱待制熹誌公出處甚詳嗣子  
湖北提點刑獄瀚復俾其序公奏議念昔接武禁塗目  
擊正論暨登二府恭聞孝宗評普安舊僚謂公莊重誠  
實語不輕發當暑未嘗揮扇其恭如此它日拔擢二三  
名臣又以公為首併追書之以補家傳嘉泰四年正月

晁氏二圖序

紹興己未予年十有四侍伯父辰陽史君寓贛之壽量  
寺其西偏則晁公諱端規字夢規與弟端矩夢矩端準  
夢準居烏它日夢規兄弟去予得其屋為書室見夢規  
大書滿壁皆勸世語嘗記兩句云緊：勒回意馬勤：  
把定心猿末云敢告諸人速生警懼今六十有六年其  
孫公定自筠寄公推本省身圖述一真所稟至一氣所  
成又有大學知歸上篇列道德教治刑下篇始於容而  
極於仁各為序論解累數萬言出入經傳間引釋老大  
要以修身齊家治人為本至於朝聞夕死之道晚益有  
得非空言也惟晁氏自文元公博學篤行兼通儒釋致

戶部公集 卷十五  
位禁林有子執政為本朝大家嘗著法藏碎金行於世  
年八十四考終不亂史氏極稱美之夢規殆傳家學歟  
嘉泰甲子二月辛丑平園老叟周某書

劉諫議諫橐序

故諫議大夫劉公諱度字汝一吳興人自為布衣修潔  
博習業左丞夢得汪翰林藻皆以賢良方正薦旋第進  
士入為學官館職紹興三十一年夏汪中丞澈薦充御  
史遷右正言明年汪貳大政引嫌從軍器監孝宗即位  
復自宗正擢諫大夫前後上九十餘疏其子瑞金宰深  
之裒成上下卷以予嘗同僚請為之序共惟祖宗專任

臺諫寄以耳目政事得失臣下否臧雖均許論議然諫  
臣因治體而及人才臺臣主彈劾而及時政其分職固  
不同元豐七年春神宗手詔曰近歲修復官政羣司各  
有職守右諫議大夫趙彥若侵越御史論事降一官左  
遷祕書監今公奏議心平氣和理正辭直薄物細故未  
嘗屑之至於小大之臣麗於過失必隨事以言知設官  
之本意或謂漢孔光上有問據經對不强諫爭懼章主  
過削其橐自後世觀之光果忠耶善乎蘇軾草諫官制  
曰進則說詞退則焚稿哀世之事朕無取焉然則深之  
廣父書予序其書所以彰主聖也嘉泰四年月日

龍雲先生文集序

廬陵郡自歐陽文忠公以文章續韓文公正傳遂為本  
儒朝宗繼之者龍雲劉公也公諱弇字偉明居安福縣  
之龍雲鄉文忠薨於穎公方冠不及從之游然斯文未  
喪何害為韓門籍湜也先是汴京及麻沙刻公集二十  
五卷紹興初予故人會昌尉羅良弼徧求別本手自編  
纂增至三十二卷凡六百三十餘篇惟公昔既不壽今  
復無嗣其姪孫上高尉希禹抱遺編而永歎嘉泰三年  
賢守豫章胡元衡平一表鄭公之鄉里訪襄陽之耆舊  
欲廣其書激厲後學予亞屬羅尉之子泌繕寫定本授

侯刻之頃嘗與鄉人論公之文如南郊賦氣格近先漢  
已為秦陵簡擢詩書序記往祖述韓柳間或似之銘  
誌豐腴規摹文忠讀者可以自得至於才學出處具載  
李彥弼誌銘羅氏跋語皆月旦評之不可易者也嘉泰  
四年五月日

文苑英華序

臣伏觀太宗皇帝丁時太平以文化成天下既得諸國  
圖籍聚名士於朝紹修三大書曰太平御覽曰冊府元  
龜曰文苑英華各一千卷今二書闕蜀已刊惟文苑英  
華士大夫家絕無而僅有益所集止唐文章如南北朝



間存一二。是時印本絕少。雖韓柳元白之文。尚未甚傳。其他如陳子昂、張說、九齡、李翱等諸名士文集。世尤罕見。故修書官於宗元、居易、權德輿、李商隱、顧雲、羅隱輩。或全卷收入。當真宗朝。姚鉉、銓擇十一號唐文粹。由簡故精。所以盛行。迨歲唐文摹印浸多。不假英華。而傳况卷帙浩繁。人力難及其不行於世。固宜臣事孝宗皇帝。間聞聖諭。欲刻江鈿文海。臣奏其去取差謬。不足觀。帝乃詔館職裒集皇朝文鑑。臣因及英華。雖祕閣有本。然舛誤不可讀。俄聞傳旨。取入遂經乙覽。時御前置校正書籍一二十員。皆書生。稍習文墨者。月給餐錢。滿數歲。

補進武校尉。既得此為課程。往往妄加塗注。繕寫裝飾。付之祕閣。後世將遂為定本。臣過計有三。不可國初文籍雖寫本。然讐校頗精。後來淺學。改易浸失。本指今乃盡以印本。易舊書。是非相亂。一也。凡廟諱。未祧止。當闕筆而校正者。於賦中以商易。殷以洪易。弘或值押韻全韻。隨之。至於唐諱及本朝諱。存改不定。二也。元闕一句。或數句。或頗用古語。乃以不知為知。擅自增損。使前代遺文。幸存者。轉增疵類。三也。頃嘗屬荆帥范仲藝。均倅丁介。稍加校正。晚幸退休。徧求別本。與士友詳議。疑則闕之。凡經史子集傳注通典通鑑及藝文類聚初學記。

下至樂府釋老小說之類無不參用惟是元修書時歷年頗多非出一手叢脞重複首尾衡決一詩或析為二二詩或合為一姓氏差互先後顛倒不可勝計其間賦多用負來非讀秦誓正義安知今之云字乃負之省文以堯非對舜榮非本草注安知其為菖蒲又如切瑳之瑳馳驅之驅掛帆之帆仙裝之裝廣韻各有側音而流俗改切瑳為却課以駐易驅以席易帆以仗易裝今皆正之詳注逐篇之下不復徧舉始雕於嘉泰改元春至四年秋訖工蓋欲流傳斯世廣熙陵右文之盛彰阜陵好善之優成老臣發端之志深懼來者莫知其由故列

興國至雍熙成書歲月而述證誤本末如此闕疑尚多謹俟來哲七月七日具位臣周某謹記

送魯公薦赴省試序

漢制太常擇民十八以上補博士弟子郡國二千石謹察好學敬長上肅政教順鄉里出入不悖者常與計偕永和曾生公薦年十有四已能修飭好書晝夜勤苦遂與儒先同上南宮視漢人年又少未易量也昔余與子中兄同乃祖季高兄弟四人俱試秋闈其後伯雲仲峻叔瞻相繼下世惟余兄弟及季高華髮相對今殆五十年矣因生錄示舉業求余一言既太息題其後又將

屈指計日候太常籍奏之報舉酒明秀接為季高賀慶  
元乙卯十二月旦前進士周某

送曾明發序

書曰非知之艱行之惟艱以孔子之聖猶謙其辭曰躬  
行君子未之有得是以孟子非苟知之亦允蹈之此聖  
賢事也近世士大夫乃謂人患不知若真知無不能行  
捨孔孟不信而惑謝顛道張子韶一時之說以謂錦繡  
蒙陷穿人惟不知乃墮其中苟知其然將遠而去之嗟  
乎以此勸中人以下使之勿習過惡入於坎窞可也若  
曰孽：為善要當以升高為喻顏淵曰仰之彌高又曰

既竭吾才如有所立卓爾人之進道必志於此陷穿云  
乎哉寧都曾君明發字見卓教携贄求予一言予聞諸  
揚子見善明用心剛夫見善不明而徒剛焉亦流於惡  
而已矣既明於善然後苦其卓入道之序也君之邑宰  
傅子淵仕學兼優不崇空言嘗試以予說論其何如慶  
元丙辰八月二十二日

送黃伯庸疇若序

嘗觀唐三百年間文章鉅公如韓柳劉白及名世諸賢  
詩文兩極其擊學者不當置論其餘專以詩名者殆數  
百家求之他文間或弗稱兼是二美斯固難矣又讀班

史傳循吏終七八人皆良二千石蓋事任尊重則名實相應令卑官也功德未孚於人况地有劇易才有長短故薛恭治頻陽則不足尹賞治粟邑則有餘換縣乃皆大治才之全者亦豈易哉豐城黃君伯庸為廬陵宰初示予古律詩二百篇用意高遠屬辭清新摹寫物象莫能遁形繼出雜文一編時論正大古賦恢闔碑誌詳雅四六溫醇是可爭文士之衡矣它日謂予評之予曰邑附郡城地廣人殷姑置是事遲君政成已而見其持己以清撫民以仁聽訟以平決事以明租庸孔時百廢具興折揚無繫弦歌有聲然後知君又可附循吏之名矣

三載考績治行轉聞召節預頌趣覲明廷於是鄉校之英旄倪之氓攀轅卧轍霧集雲蒸跬步莫前矧容嚴程或曉之曰挽留賢令士民之情也樂與賢者天子之誠也君方以墨妙筆精而為華國之文推學道愛人而策濟時之勲奈何因德惠之可懷滯鳧鵠之朝京乎衆始退聽車乃適征平園老叟周某聞而嘉之而筆之非特紀實贈行亦所以償夙心也嘉泰元年十一月七日

蕭人傑如寄齋說

太和蕭人傑即所居作如寄齋取蘇文忠公吾生如寄耳之句以自警丐予為之說蘇公博極羣書無不用之

事而波瀾浩渺千變萬化復語絕少獨此一句不翅八  
九次用之訪張天驥寄子由過淮和王晉卿次劉景文  
韻送芝上人王敏仲末年遊鬱孤臺諸詩皆不易一字  
其他人生如寄何不樂之類尚未論也此理本出莊周  
記孔顏之問答以為世人直為物逆旅耳解之者曰不  
能坐忘自得而為哀樂所寄也魏文帝晉謝安輩始形  
於書詠於樂府至公然後表而出之其從宦每以仁義  
為歸宿遷謫則遊於逍遙之墟食於苟簡之田立於不  
貸之圃圃平生所得情見乎辭哀樂且不能寄奚暇問重  
複耶坐忘自得庶幾乎顏氏子矣蕭君其以是寘坐右

有好事者示之母但寄傲南窓而已慶元二年八月二  
十八日

張德清悅齋說

邵武張瑩中字德清有志問學名齋曰悅屢求說於予  
老病未報也至是其鄉人廬陵簿李子貴賢代歸因告  
之曰人必有羨於外斯有以悅於內自然之理也今夫  
口同者味耳同者聲目同者色三者必有物然後口與  
耳目悅而好焉若心之所同則不然理與義而已二者  
非外也吾心亦內也故孟子云理義之悅我心猶芻豢  
之悅我口至於荀卿又加詳焉其言曰耳目鼻口形各

有所接不相能也。心居中虛，乃治五官。是天君，其所以開導後人，無後餘蘊矣。今子布衣蔬食，皇四方，就有道而正焉，豈適為口耳之好哉？是必義理之心油然於其中，可謂知所悅矣。予既以孟子發其端，又因荀卿辨其名，復以孔子之訓廣之。夫學而時習，固自可悅然。必切磋琢磨，乃極其至。故繼之曰：有朋自遠方來，不亦樂乎？蓋知不如好，不如樂。此淺深之辨也。人能推義理之心，常正其天君，使好惡喜怒哀樂之情皆得其正，則所謂顏氏之樂也。內可勉而進，彼紆朱懷金，何足道哉。

習齋說

永新歐陽邦基字壽卿才贍學富為善如飢渴嗜飲食其子宗闢齋家塾請予命名予曰論語首言學而時習之實二十篇之樞要宜以習名併伸其說夫天命之謂性有時移於習故伊尹言太甲之初習與性成吾夫子亦云性相近也習相遠也學者可不謹其習乎蓋習有是非習是則勝非習非亦勝是顧朋友講習何如耳嘉泰三年八月二十七日

周伯熊勤齋說

天運故健日月行故明水以常流故不竭人勤四體故

無疾自然之理也上而為君克勤於邦下而為臣克勤  
無怠微而庶民勤則不匱皆是物也宗人伯熊字武伯  
南城人進士登科佐邑安福屢求齋名請名曰勤而告  
之曰子欲學乎業精於勤願以韓文公為師子欲仕乎  
能勤有繼願以卻成子為法志苟立焉推而上之功崇  
業廣古人不難至也慶元四年五月七日

茶陵學林堂說

茶陵軍雖衡之附庸然地大多秀民登科者相望紹熙  
間譚君世選鏤廳第進士鄉人稱之猶子知言思繼其  
美築學林堂讀書著文曾不少怠其友谷若霖遠訪予  
力求一言孟子曰修其天爵而人爵從之惟能以仁義  
忠信樂善不倦相與切磋則公卿大夫且將馴致况一  
第乎不如是不可謂之益友慶元丁巳七月

楊光祖筠溪說

禮器論禮曰如竹箭之有筠正義以為青之見於外者  
聘義論玉亦曰孚尹旁達信也正義以孚尹為浮筠言  
其采色也夫有諸中必形諸外故江道竹賦云含虛中  
以象道茲非本乎曰有筠曰孚尹茲非文乎譬之於禮  
忠信禮之本義理禮之文無本不立無文不行二者兼  
備則貫四時而不易葉也宜矣同年楊謹仲清江名儒

其孫光祖兄弟修身嗜學力守家法華宗待制廷秀既  
大書筠溪以賁攸居予復推其義以勉之嘉泰二年五  
月十日

錢氏姑瞻庵說

待制錢公葬江陰之由里山其子廷玉等即塋築庵求  
名於平園老叟周某為題曰姑瞻致不死其親之意爾  
雅山多草木為姑無曰此說文亦然獨毛傳相反正義  
疑轉寫之誤云嘉泰壬戌三月朔

書贈茶陵谷若霖

紹興初叔父靜江府君令衡之安仁與邑人谷槩世平

善予年六七歲侍重親在焉尚能記當時事今六十五  
年矣而世平之孫若霖數自茶陵訪予廬陵予問越在  
鄰邑之意其說有二祖娶茶陵陳氏陳氏有孫弁字令  
升力學好義葺城南書院榜其堂曰帶經招延名勝以  
中表之故而館我一也邑儒譚君世選字勤之紹熙間  
鏢廳第進士有姪知言尤向學年方踰冠築學林堂讀  
書其中復以我為友二也予自念帥湘中者三年既不  
獲一至安仁訪童子之舊游又無由登覽二堂察大邑  
之風俗衰老懷舊安能忘情因君乞言為別書以遺之  
慶元二年十月十八日平園老叟周某序



書示臨川陳撝

臨川陳生以易卦推人休咎來求一言予於易固未能  
學而休咎又非所問案間偶有正易心法及易索兩書  
遂以昇之心法出於麻衣道者其傳則希夷先生也讀  
之可以求天理易索吉之太和名士張汝明作讀之可  
以知人事二者苟盡心焉於休咎乎何有慶元己未六  
月辛未平園老叟周某序

書示永豐彭肅

永豐析吉水為邑壤地褊小徒以歐陽文忠公故鄉且  
先塋在焉故士之力學好修者衆文獻不絕近歲曾幼

度羅永年又以詩文為諸生倡始欲家屈宋而人賈馬  
也幼度門人鄧傳之字師孟勤身勵志間復從師友於  
四方然用意深切故辭多刻苦永年有子曰煒字晦之  
天才雋甚父子自為知己出語輒驚人然有時乎悲傷  
予常憂其不壽已而果然今二子之友彭肅寬伯携文  
過我學術開廣詞調清婉進修不已致遠之器也昔七  
子賦詩可觀鄭志予雖無趙孟之識亦庶幾億則屢中  
云嘉泰元年正月甲戌

書贈安福劉儼子思

往年楊廷秀歎劉儼子思才名二十年獨遺塲屋今又

十五年未遇如初予安能知盍問諸嚴君平乎不然讀  
房千里骰子選格序為一餉之歡洗積年之滯可也嘉  
泰壬戌閏臘十日

書曾無疑匹紙

蘇文忠公素慕白樂天之為人蓋二公文章皆以辭達  
為主其忠厚樂施剛直盡言與人有情於物無著亦畧  
相似樂天為忠州刺史作東坡種花二詩又有步東坡  
詩云朝上東坡步夕上東坡步東坡何所愛：此新成  
樹文忠公中年謫黃州偶因築室遂號東坡居士嘗賦  
八詩其屬意有自來矣後為從官羨慕樂天口之不置

如云定似香山老居士世緣終淺道根深又云我似樂  
天君記取又云出處依稀似樂天其他形於詩者尚多  
惜乎間居二十年之志迄莫能遂黃門公不云乎子瞻  
之仕其出入進退猶可考也後之君子其必有以處之  
矣慶元己未三月三日友人曾無疑出示匹紙為書此  
說

書匹紙贈安福劉澈

紹熙辛亥十一月其赴官湖南道由安成劉偉子才投  
贈十詩有味其言後十年餘當嘉泰壬戌季春子才之  
子澈携以相示又出子才雜詩一卷皆有待制揚公跋

語是足增喬嶽之重矣澈也復以長書及二詩銜袖為  
贄予受而讀之既歎且喜歎者何也感歲月之邁惜子  
才之老也喜者何也劉氏三世俱以文鳴其興殆未艾  
也會得匹紙為書頃所作西溪後序并子才十詩又錄  
二跋以遺澈餘紙甚長歸示鄉人必將贄先德而傳後  
學毋以羅趙在前遂不顧也二十日平園老叟周某記

書匹紙贈許玠介之

高宗初元首用襄邑許崧老為尚書右丞文章議論不  
待贊也今曾姪孫玠學有家法自衡州携詩相遇格律  
高深詞語清麗予手之不能置求一言以為別予素不

能詩矧敢塗澤無鹽効顰西子乎適有匹紙輒書其樂  
府四篇於卷首繼此得佳句請續於後軸滿復以相示  
更當刮目待阿蒙耳嘉泰壬戌三月二十四日

李燁縣尉字說

同門壻崑山李君初名國才字良佐未冠補太學生學  
問日益新而試輒不利歲在丙戌夢人告以大運即發  
因授火傍三字覺而更名為燁自是試必占榜今調宜  
興尉而字猶良佐也以書請予更之按說文解字燁訓  
盛且引燁：震電之詩夫震雷之電盛則過常故詩人  
以為異然於文從火從日華皆有光明華煥之義宜捨

盛避異字君曰道明蓋東晉荀闓蔡謨諸葛恢所同字也當時號中興三明為之語曰京都三明各名蔡氏儒雅荀葛清君馳聲上庠數十年非儒雅而何一行作吏又以清聞則於道光明視三子為無愧矣紹熙五年閏十月周某書

趙汝橙縣尉字說

皇諸孫汝橙字茂實謂予花木無不結實於名為泛願更其字予曰橙佳果也雜見淮南子說文東觀漢記晉令風俗通博物志廣志異苑風土記上林蜀都揚都諸賦中所美者色香味而已至於形容其器質韓孟為優

城南聯句云鵲殼攢瓌橙蓋珍之也譬諸人則國之寶也唐朝蘇瓌有子名頰字廷碩父子皆賢請合二美易字廷瓌斯不泛矣又有以勉君昔者汴京植橙禁中號為珍異仁宗召宗室及侍臣同觀於慈聖閣宋祁詩云帝憐秋實茂天許本根強又曰不隨江北化思助廟中嘗末云榮觀聳麟族賦筆助荷囊厥後英宗眷禮侍讀學士劉敞以其在告遣使賜新橙五十備載史傳君年方英妙當周以宗強之時悉心問學自取科第它日進修不已為國寶臣或預榮觀或拜珍賜廷瓌之義庶有合哉嘉泰二年三月二十四日

蕭光字說

龍泉蕭光字煥之求字說於予孟子曰克實而有光輝之謂大克實內也光輝外也有諸內乃形諸外本朝司馬溫公名光字君實是也揚子亦云晦斯光夫惟侍坐君子言可聽也禮可觀也自晦而光其光彌明唐杜如晦字克明是已既名光矣煥何加焉字曰晦之意義乃全詳說反約古人皆然咨爾君味孟子揚子之言思溫公杜公之賢奉以周旋其永無愆嘉泰三年八月二十六日

姪孫顯字說

彥思姪三子長顯字晉臣慕陳顯也次顯字稷臣謂魯顯也季顯字：以圭臣能勿誨乎卷阿之詩曰顯顯昂：如圭如璋大凡為人必以禮義切磋之使貌溫而氣盛如玉之圭璋然後有威儀焉有聲譽焉此所謂吉士也不然表裏砒砒人將汝玼顯其念哉嘉泰三年正旦八叔翁書於明農堂

田炳名訓

柳州別乘田君貢甫之子阿章生九年而未名今歲冬至天子初郊貢甫格當任子將以名聞其群從兄弟名皆從火有請於予：名之曰炳字以伯視揚子不云乎

知其道者其如視忽眇綿作炳夫視大必自細視遠必自近舉目於此炳然於彼推而至於先知皆是道也童而習之常視毋誑及其長也克明顯光然後可以世濟其美無負國家賞延之恩矣炳乎勉旃慶元三年

平園續稿卷第十五 終

平園續稿卷第十六

周益文忠公集五十六

啟 親書附

回潭州朱元晦啟 甲寅

推轂吳京開藩楚甸先聲久播美化即成惟朝廷急於用人而郡國艱於謀帥雖宸心加意于簡擢顧物理有時而乘除積弊在前必得賢牧齊其政庸夫之後正須真儒變其風自昔所同厥今尤著恭惟某官奮百世之下得六經之傳聰明天分之高道義躬行之至宜論唐虞於廣廈乃煩羊杜於征南坐使湖湘立成鄒魯某三年佞儼萬事摧頽賦陶令之歸幸諧素志推謝侯之去

可卜輿情已荷匿瑕更勤削牘佩交承之厚德激愧感  
之深悰

回隆興趙子固 鞏啟 又

兩辭鄉部之麾自知非據一用皇華之使咸謂當仁事  
殊榮戰之遙臨人喜湖山之自得恭惟某官行推多士  
才過萬夫治聲久著於蜀門政術尤高於江右我思用  
趙振馬服之威名無以易堯契高皇之善任已寓文謨  
之直即聯禁闈之班俯眷哀疲曲貽緘翰珠簾畫棟莫  
陪坐上之賓藤杖芒屨方受部中之賜其為欣感未易  
名言

轉少傅致仕謝宰執啟 又

引年遂請已荷曲成增秩示恩益彰洪施哀悰易感厚  
德難名欽惟國家度越載籍粵從選調爰暨大僚皆於  
休致之時被以陞遷之渥既昭邦典仍篤士風如某者  
初無一日之長幸際四朝之盛涼：蹠：嘗恐蹈於鄉  
原暖：妹：敢自安於私說究其老矣曷不歸哉人譏  
大棘之龐眉心慙四明之狂客奏章上徹俞旨下頒冠  
掛虎門岸角巾於東路車垂夏篆策徒步於南岡永全  
麋鹿之生寔出夔龍之造茲益恭遇某官股肱任重甄  
治功高推冕旒優老之仁為簪笏抽身之勸是令朽邁

不夫光榮勇退急流雖前修之或愧倒行暮日庶後悔  
之能逃銘佩在中敷陳奚究

回金陵張定叟尚書啟 乙卯

加職西清擁旄東府寬顧憂於南面懔威畧於北方惟  
今秣陵視昔洛宅眷懷先正開濟中興早歲鈞樞贊高  
廟定都之策暮年藩翰宣壽皇復古之威成功豈在於  
他門濟美必由於賢嗣蕭相運關中之粟已賑饑羸夷  
吾撫江左之憂更觀勛業事樞之執畧刻以須臾甫遂  
休官豈應為佞敬酌來貺聊述輿言晤語方遙傾依彌  
切

回洪帥單虞卿侍郎啟 己未

臨遣近臣保釐方面古之督府今乃潛藩德化倣敷顧  
憂頓釋恭惟其官儒猷粹美政術通明論思正弘於貳  
卿豈弟備彰於六郡西江勝概聊舉雲雨之簾南省清  
班即曳星辰之履豈應宅牧遂緩賜環某幸與農疇共  
棲宇蔭辱華棧之甚寵視朽質以增慙欣感交懷喻言  
曷究

回隆興帥張伯予尚書啟 庚申六月

內聯禁直外領帥藩竊觀鼎族名世之英嘗受阜陵登  
畿之眷迨今選授抑有端由益烜赫舊都潛却節旄之



故在而岩冕新閣淳熙雲漢之昭垂兼而昇之榮則深  
矣恭惟某官端方全德博洽名儒家傳忠義之規世濟  
直清之美再登朝路倍結宸知惟糾繩司國論之是非  
惟封駁係政幾之得失凡有志一時之士皆假途二者  
之間望愈隆而人愈推公每進而寵每避既儀八座實  
適四隣復屢控於封章竟斜飛於征鎮外有五長雖上  
法於周官入為三公恐難稽於漢制某睽違久矣庇賴  
在茲設榻東湖豈君侯之有靳迷津南浦歎病叟之無  
緣因酬誨賜之殷勤不覺感悰之切怛

回潭帥趙侍制不迹啟

辛酉

東浙名藩疊書課最南荆鉅鎮申昇帥連湘水波澄嶽  
山勢重恭惟某官世傳令德躬稟異材詞章賀白之儔  
譽望閒平之亞自結冕旒之眷獎徧更麾節之劇繁人  
云挾山起海之難公乃破竹折枝之易詔門候對已優  
踐於禁途省坐論思即冠班於常伯某櫻疴衙宇引領  
高牙昔者分携已越一星之久今茲掩惡尚煩五政之  
餘過勤盛禮之施殊愧前緘之簡其為欣感未易數云

回豫章韓帥子及啟

壬戌

祥開鵲印命荷熊旂十國為連群州承楷恭惟某官姿  
凝瑚璉之器家襲鼎彝之勳漢內史之居官以經術潤

周益公集 卷之六  
四  
飾吏事周司徒之敷典篤世忠服勞王家垂踐中臺力  
祈外閫惟徽皇定尉安之府肇自政和而忠獻登齋戒  
之壇適當皇祐方上聖適追於前烈宜後賢復踵於先  
猷榮戟一臨軍民交賀相尊等耳聊冠武階公袞歸兮  
即儀文陞某昔叨事契今齒部民姓名未洗於丹書牋  
翰羞塵于玉帳詎期厚禮首及陳人南浦飛雲目極滕  
王之閣東湖設榻夢遊孺子之亭欣愧兼深喻言徒費

謝陳提刑 謹生日詩啟 壬戌

解九夏之齋自恣誤投於世網校中元之籍長生敢擬  
於仙曹未瞻使者之繡衣先拜美人之錦段妙甚唐賢

之律申之使 之言何臺治之倣臨為部民而加禮歌  
明月之章於赤壁諒因歲日之俱同穆清風之誦於東  
方敬祝壯鸞之邁返其為感詠交集襟襟

謝許監丞 知新生日詩啟 與予同 壬戌 歲渠長

庚威雖甲辰敢攀壽雉公瑾小一月適契吾宗過軫高  
情曲形盛禮賦兩詩而寵甚及二丙以欣然 綸與子檢  
法皆丙子

生來詩憶元豐壬戌之明年有潞公丙午之盛集今幸  
及二丙 密隣於几杖阻陪高會於笑談頌詠攸深敷宣罔既

謝權守鄭通判 臨生日詩啟 壬戌

解九夏之齋自恣誤投於世網校中元之籍長生敢擬

於仙曹荷邦君意重於岱嵩推家學文成於黼黻併勤  
饋遺疊致頌言贈我金錯刀增光篋笥報之青玉案徒  
愧砒砒悚感交懷喻言奚究

回陳正仲提刑賀冬啟 壬戌

登望闕之臺黃雲徧覆按屬城之獄綠草羅生盛哉穰  
簡之祥時乃平反之報恭惟某官螭塔良史虎觀鴻儒  
曼倩繡衣時當剛長晉卿愛日坐轉冬溫即遙四牡之  
歸玉應一陽之復憶去歲茲辰之禮密近天顏詠明年  
此會之詩定陪郊祀方圖馳問已辱擣詞感與頌并意  
非言盡

又謝生日詩啟 癸亥

益州刺部固多中和宣布之歌魯頌獻囚繼有耆艾熾  
昌之頌蓋仁愛素孚於郡國則歡謠交著於士夫敢期  
德性之好謙反為部民而致禱寵之唐律薰以班香靈  
均初度之嘉走無是也魏野中元之句公則過之在愧  
感以俱深豈叙陳之能既

謝吳運使時顯生日詩啟 答其用寇萊公文潞  
公事渠致仕而歸蓋

己卯宣城所  
解進士。癸亥

繼萊國而生已愧中元之句憶宣城之舊更驚四紀之  
年會華節之遙歸擣雅詞而下屬洛陽舊德不稱擬倫

履道燕居幸同休退願歌赤壁共揖清風在欣感以交  
懷非叙陳之能既

復少傅謝諸府啟

癸亥

疵瑕又積灼然復玷之難造化密庸倏若轉圜之易倍  
極輪囷之感熟窺塊北之垠伏念某稟質凡庸仕塵顯  
美居不思于特立動或蹈於妄行言路糾繩殆盈百謫  
宸衷涵覆止削一塔未蓋前愆已仍舊貫茲益伏遇某  
官道高遠古勲在王家心同稷契之忠時際唐虞之盛  
好善優於天下何區、樂克之強若已納之溝中每切  
切商衡之任助聖明之篤舊開老退之圖新遂使里居  
獲刊罪籍班通九棘阻瞻槐位之尊身托一枝自幸林  
巢之穩其為佩荷罔既敷云

回嚮州章

茂獻

侍郎賀復官啟

癸亥

掛冠久矣麗丹筆以猷新出綉粲然指青氈而復舊恩  
固由於舜禹助亦假於嚴徐茲益伏遇某官念氣類之  
同篤鄉隣之好獻可替否每効論思之言嗻枯吹生更  
推獎譽之惠致冒雲霄之擇免貽田野之羞方欲馳辭  
已勤貽問紆丈二之組望之將涖於左馮率三千之臣  
召伯行登於右相因酬嘉貺併致忱言

賀陳正仲提刑除職啟

癸亥夏

策勲劇部加職清廟計前日之班資合徑叅於義畫重  
公朝之名器猶假寵於文謨綸綍光華紳悅懌恭惟  
某官學高游夏文儷淵雲當直上於禁途尚斜飛於廉  
使吏民改觀欣康侯晝接之蕃旒冕注懷佇宣室夜前  
之席某素叨眷誼倍極懽悰手續亟馳衷誠莫寫

又回賀 綸 審察啟 癸亥

子能仕而教之忠每慚古訓賢在上而引其類首辱裏  
言未嘗學禮于孔庭乃許觀竒於漢閣此蓋某官昔聯  
中憲持論挺然今領外臺揚清銳甚既噓枯於屬吏亦  
借潤於陳人恐傷公舉之明尚闕私書之謝先勤慶問

倍激感悰尚惟高明有以矜亮

賀陳勉仲拜右相啟 癸亥

庭揚大號國拜中臺名世之生五百年時方際可太學  
之興一甲子今乃得賢恭惟某官德業兼隆詞章獨步  
伊尹樂堯舜之道素蘊蓄於胸中韓愈視遷雄之才亶  
推尊於海內周旋二府啟沃九重甄冶無心器方員以  
各遂權衡有信物輕重以皆平茲專面以正朝益同心  
而輔政方且恢四維而厚士俗闢教路以收人才稷契  
臯夔固將踵武蕭曹丙魏豈必希蹤二十四考之方書  
前後數公之罕及其雖還初服尚托大鈞願偕沃壤之

此共樂熙臺之化其為欣幸固罄敷陳

與揚廷秀閣學啟 二十首

回甲寅賀冬

朝登度雪之臺黃雲入望間領遊帷之觀白日自長雖  
節令之衆同在安榮而已獨恭惟某官道符剛長性察  
物成詞章添繡線之華聲譽振黃鍾之響時逢小至慶  
集大來某特辱摛詞更勤致饋仲尼百榘醮酣無底之  
清德裕萬羊厭飫有期之產中心積感多語奚殫

度雪臺在揚秘監園中遊帷觀即玉隆宮揚所領祠無底清所送酒名

賀覃恩轉中大夫啟 甲寅

聖主卜大橫之兆名卿夢中穗之禾汲黯常居是官以  
諫諍而外補神宗尤重此秩待疑丞之初除公比德以  
何慙上登庸其可必屬抱疴之未愈欲請間而不違輒  
以懼悰寓之折簡尚需召駟別展慶儀仰惟高明俯賜  
鑒察

回賀入新第啟 甲寅

市近囂塵賴景公而更定書兼草隸荷外監之屬辭矧  
茲蓬戶之居時乃棘闈之址當年附驥七十子之同升  
半世營巢三十年而始有念衆隽迄今而無幾幸兩翁  
相望以非遙倘因黃堂舍蓋公之時就為雪舟訪安道

之計殺雞為黍當停荷篠之芸鳴鹿而歌共話揚侯之  
譽其如感幸因既敷宣

回乙卯賀年啟

正次于王新天子一元之歲未加于卯外秘書三合之  
年方興運之鼎新宜真賢之泰內而况多文為富直道  
而行博古通今重漢廷之經席危言謹論發晉殿之酒  
樽在故事以雖聞舍明公其孰稱即頒銀信遂度玉墀  
微費攸陳竊幸鄉風之舉盍簪莫預遙思握馬之喧惟  
是勤拳莫容殫叙

回乙卯賀冬啟

景占圭表應一丈三尺於牽牛注就韋編推六日七分  
于大象翕爾履新之慶萃于博古之儒恭惟某官溫厚  
足以破嚴凝剛方足以祛邪枉聲名遠播符廣莫之雄  
風壽祉丕延同舒長之化日當芸荔挺生之際是絲綸  
誕布之時拾遺班北極之天方膺異寵冢宰相園壇之  
陞更祝後年某甫治書郵遽勤誨牘泥盤中之金露醉  
德孔多籲天上之白羊屬饜何幸未酌盛禮姑致感悰  
尚冀台慈俯垂鑒察

賀除待制啟 丙辰

懇辭嚴召適賚殊褒旌東觀之儒先拜西清之閣老恭

惟某官冰霜其操金玉厥躬貫日忠言規模稷契凌雲  
藻思步驟莊騷上自兩宮下通四海莫不哀窮而悼屈  
謂宜捷出以橫翔雖越冷熱撰而上征是名異數然歷  
大少蓬而次對誰可同條豈持橐之無人獨起家之有  
耀詔札密封于泥紫服章光暎于鞞紅朝廷鄉黨三備  
達尊已壯吾邦之觀官職聲名俱歸詩客更追乃祖之  
風某心馳賀履之成迹歎出門而礙念棘闈之宿契懷  
栢棧之深情手牘所陳心聲莫寫

遠迎啟

丙辰

恭聞騎氣將遠啟閩父老懽迎吏民距躍益一佛出世

觀共快於爭先豈二人同心馬宜奔而敢後正以衣冠  
之掛難于簪橐之新在隱顯以差殊非禮文之簡怠高  
明所照悃幅何逃仰冀薰慈特加孚察

回丙辰年啟

曆紀火龍班高金馬齊耆英於溫洛信古來稀聯法從  
於甘泉從今伊始恭惟某官道偕時泰年與德升妙論  
聚花春頓生於坐上仁風偃草冰潛泮於池中衆人望  
公如熙臺四時待公為玉燭必也重高門之地豈其遺  
青笠之心某占詞未成飛翰何速膠牙藍尾深思常侍  
之同新曆舊符竊起東坡之歎其為感詠莫既敷陳



回丙辰賀冬啟

南溪測景符周圭畫景之長東魯從心測義易天心之  
復當兢辰而考古宜受祉以及今恭惟某官無心如迎  
送之雲觀化應舒長之日名恭禁路諒懷憶昨之班使  
總郊壇預卜來年之慶神人所相福祿其綏某已屏冠  
裳莫陪簪履沐緘書之腆縟愧禮度之愆忘欣頌交深  
指陳曷喻

回丁巳賀年啟

頌正朔以示庶邦甫窺堯曆即嘉平而數新歲已涉商  
正慶贊宜先馳辭敢後恭惟某官事隨時並德與年新

漏水滴徐重繹泰亨之象篆盤香永賸哦元會之詩柳  
條况洩於韶音花塢難牽於野興綵旗簇仗行趨濟  
之朝白獸發搏聳聽堯之論某銳欲勤東道之主深  
恐致北山之移徒紆頌咏之情莫寫依歸之志

回丁巳賀冬啟

元后肇禋已受釐于宣室叢祠均逸盍扈駕于甘泉瞻  
南極之景長慶西清之福備恭惟某官仁心夙著剛德  
時亨律回解谷之陰人愛晉卿之日天時已至召節相  
推某拱聽先聲將臨近郭刺繡五紋之弱誰能間驗於  
女工風流二老之強但願叨陪於賓燕其為欣頌罔究

叙陳

回戊午賀年啟

彩勝金幡曾共漢朝之元會蒼顏白髮今齊絳老之遐  
年瞻室迹而人遙殆形留而神往敢期覽記亟治書郵  
恭惟某官德逐歲新名隨日起春風和氣坐銷客子之  
塵心御柳宮花難狀詞人之妙語佇傑深嚴之直參裁  
寬大之書某久矣游從茲烏間濶郊閨相望莫陪真率  
於耆英酒醖前陳乃幸屬饜於盛德其為感愧罔既數  
陳

回己未賀年啟

一元歲之始漢頌寬大之詩五福壽為先魯獻熾昌之  
頌當國家之圖舊繫年德之加新恭惟某官膏雨蘇枯  
仁風解凍徑三：而成趣時逢花柳之春卦八：而終  
篇繇應乾坤之泰即適駟召遂押廷班某哀疾龍鍾絨  
書猶豫十漿先饋敢為列子之驚六鷁退飛竊鄙於陵  
之願其為欣荷罔究願言

餽歲小啟 己未

芳歲將除椒觴載舉盍簪喧馬恨阻勝游對酒愛鵝首  
蒙厚禮不腆牲餼往陳庖厨物雖微而誠在焉施已豐  
而報何有尚蘄容德未置大訶

賀致仕啟 己未十一月

掛冠神武錫馬康侯職在紫清榮陞四等秩叅黃散優  
進一階詔綽光華播紳歌艷恭惟某官直方如伯起清  
約如公權準易有執戟深湛之思為文無盈川輕薄之  
體具今古之全美震華夷之盛名延登可期勇退何果  
風月三千首重繼翰林休閒二十年定追洛社蓋意新  
者寧拘齒宿而德邵者常在年高優哉游哉休矣美矣  
見古人而一笑時揮鶴禁之金通大道以三盃日飲螺  
岡之酒某游從最舊出處頗齊前進士同稱猶記曲江  
之宴故將軍相過任從醉尉之呵願言俾壽之昌永作

斯文之重

賀己未冬啟

子月四時之首周德天正黃鍾六氣之元漢為律本惟  
昔重陽剛之復茲今宜賢德之亨恭惟某官道與時行  
福同晝永浩養激葭灰之動文衡量圭景之長砌下芸  
生記蓬山之舊長隴頭梅放兆鼎寶之終調戲藏陰壑  
之冰間燕晴窓之日甫也懷兩院寄五更三點之篇牧  
之勉阿宜祝十紙一箱之讀某未作南溪之泛先勤北  
海之尊數九：而哦詩自憐午瘦辦多：而有酒驟覺  
冬肥欣感交懷敷陳罔既

賀庚申年啟

百二十日而為春喜重添于閏月億萬斯年而啟運慶  
五值於初元阻陪後閣之賓遙致先盃之讓恭惟某官  
氣調玉燭膏潤青陽聿來湛：之祺胥樂熙：之衆柳  
催槐泛記絲光日彩於東宮珮解簪抽想名號風儀于  
西洛顧夙契時中之道盍起超泰內之朝亦惟舊人共  
政之圖歸趨新年太平之賀某居慚老伴每辱先施出  
丙入丁幸附壽星之次乞漿得酒載欣申歲之臨頌詠  
攸深指陳曷喻

賀郊恩進開國侯用子封通奉大夫啟 甲子

文帝席前爵錫通侯之貴魯公拜後陞陞三品之崇  
惟家國之榮何但鄉閭之慶某幽憂所萃贊喜弗先徒  
深羨慕于再三姑述悃誠之萬一

又賀增秩晉爵啟 甲子

恭審秩漢皂衣執周穀璧彰前旒之念舊煥疊組以俱  
新行下蒲輪立登槐位某杜門哀疾賀厦邈綿敬布懽  
悰仰祈炳鑒

謝臨慰啟 又

丙助云亡外姻未至首紆緹騎遐顧素帷既陳德人一  
束之芻復往子舍三株之樹屬櫻纏於拙恙阻摧謝於

高閣救民有喪公不愧谷風之什刺人無禮走奚逃相  
鼠之譏姑候痊平之時自歸臯緩之罪謹令賤息先布  
忱言仰惟台慈俯賜澄察

親書

回蕭郎中親書

壬戌

渝川螺水密聞雞犬之聲樞筦鳳池憶送夔龍之集繫  
夙隆於雅契盍肇講於嘉姻茲承親家國史大著郎中  
長令似監倉承事業茂清修稱玉筭神仙之裔而某長  
孫女十七娘性存柔順知召南法度之循敢緣聲氣之  
同妾意琴瑟之好遠勤厚禮有華用鴈之儀何幸哀宗

將竊乘龍之喜不腆回幣具如別緘

與胡季解求親書

壬戌

託契先公嘗遮禁林之宿依仁大族久陪鄉社之游將  
為徵福之圖輒致求婚之請伏承親家通判左藏第三  
小娘子婦儀夙著有采蘋南澗之恭而某姪承事郎新  
監隆興府苗米倉某家訓粗遵無坦腹東牀之傲飭行  
人而聽命資薄幣以馳誠劉范世姻庶益堅於永好崔  
盧門戶尚何假於他求不腆之儀別緘具載

平園續稿卷第十六

終

平園續稿卷第十七  
周益文忠公集五十七  
狀

平園續稿卷第十七

周益文忠公集五十七

狀

謝賀生日狀

謝贛州

老逢初度彌追感于親庭誼篤鄰居乃寵移于樂府粲  
然新句賁此哀蹤調周雅之清風永懷何已歌楚人之  
白雪寡和固宜

謝寄居通判 丁巳

老而不死方永慨于劬勞愛之欲生乃曲形于褒借穆  
清風而作誦祈黃耆之維祺聚群玉于西崑病眸空拭

鐔大鑪於東序俗耳彌驚愧感交懷敷宣罔既

謝路鈐路分

生我劬勞方切蓼莪之感錫公純嘏過勤黃髮之祈高  
誼重于丘山正聲諧于金石穆清風之誦罔知鴻筆之  
有餘投明月之珠益愧哀蹤之弗稱但深銘佩莫究叙  
陳

謝憲司提幹檢法贛州路分將官教授五人共

一詩 壬戌

特紆厚意遠記賤生合六律以諧聲粲多儀而設醴自  
慙朽邁曷稱吹噓惟傳存與獻之規且禮著往來之訓

紅羅不腆聊資碧線之抽綠綺甚華殊乏南金之報其  
為感荷罔既敷陳

謝邵英德 之網生日詩 以沉香并英石為壽賦詩

分竒芬于海上已薰班氏之香列遠岫于窓間更詠謝  
公之句有華二美來壽一夫惟愧感之交懷豈叙陳之  
能既

謝李賀州 網生日詩 癸亥

老矣無能豈初生之尚記粲然有接何舊好之彌隆形  
妙語于篇章列多儀于香幣三復頌言之美載深悚感  
之懷

謝贛州齊登判 天覺 生日詩 癸亥

月宿南斗偶類韓公之生誦如清風過勒吉甫之作頌  
乘除之何有視頌好以多慙循正則之名方悲初度致  
敬恭之幣姑藉未將感悚交懷敷宣罔既

謝贛州路分主管提幹檢法教授生日詩

竊以負之六射悵永感于頽齡作者七人辱聯成于傑  
句嘉果餽牽而侑酒妙香庭燎以祈年為禮既豐寄情  
良厚降非正則方慚初度之名實在恭欽聊假未將之  
幣其為悚荷罔既敷宣

謝鄭通判 臨生日詩 又

靈均初度之名久茲永感魏野中元之句富矣嘉言正  
深饋鯉之悲乃屈屠龍之筆海沂康矣盍歌別駕之功  
吉甫穆然反辱清風之誦中彌積愧倒置多慚

謝黃經畧王南劍鄭通判徐提幹生日詩

揆嘉名于初度每感劬勞生上相于中元敢希賢哲荷  
高情之繾綣形善頌以殷勤歌明月之章已窺慕思穆  
清風之頌更滌煩襟欣感交懷敷陳奚既

謝狀

致仕謝守倅寄居 乙卯

特勤枉駕俯慶垂車傲掛衣冠阻趨檠戟 餘官作 其為



愧感罔既敷宣

謝楊守門送上塚

丙辰春

竊以岳牧下車將禮神而夙駕州民上塚乃飛蓋于晨  
門佩謙德之加隆激懦衷而增愧

謝趙守門送

歲時掃墓是為老之常車騎塞塗乃屈邦君之重不  
遑拜辱但劇懷慙

慶禮賜粟帛謝太守

乙未

特枉前驅敬宣上賜昭二聖交歡之慶示九重優老之  
恩榮幸良深敷陳罔既

復少傅謝監司

癸亥正月

某祇奉新綸寵還舊秩赦過宥罪仰自聖君之仁嗟枯  
吹生外由膚使之助緘書先暨感臆增深

益國夫人襄奉謝守倅

甲子

自頃悼亡迨茲送往疊勤芻奠仍製薤歌前車遠出於  
郊闕厚禮倍光于阡陌永言感愴難盡敷云

遠迎狀

謝黃侍郎

艾遠迎

丙辰秋

茲承嚴直禁嚴出臨征鎮接壤喜瞻于法從齊民諒偃  
于德風屬此病哀阻于廷謁先勤告至倍極馳情

趙守遠迎

茲審九重臨遣千騎昂來屬得謝以里居阻爭先于郊  
勞其為企詠難盡名言

孫侍郎逢吉遠迎

茲審榮剖竹符暫歸梓里屬緣老病不獲攀迎先辱惠  
音第深懷感

監司遠迎

茲承使節行按屬城方掛朝冠阻干賓謁其為企詠徒  
劇懷悰

又

茲承肅持使節行按列城屬當退屏之時阻快爭先之  
觀其為愧悵罔既敷宣

張憲行郡遠迎

茲審奉詔按刑揚帆及境既阻爭先之觀首勤告至之  
文愧感良深喻言奚究

又

恭聞使艦行按列城屬以抱疴阻于納謁先勤告至第  
切感悰

又

茲審衣繡詳刑揚舲按部屬緣拙恙阻造行臺愧企良

深敷宣罔既

葉憲遠迎

茲審某官肅振使華按行封部屬養病于私第阻納謁于公門愧企兼懷敷宣罔既

葉憲改江東遠迎

茲審某官寵膺新節榮歷舊封雖快觀之未遑喜先聲之已至其為欣企罔罄敷云

新贛州張舍人貴謨遠迎

茲審某官榮擁使旌經從鄰壤雖不遑于迎謁尚有幸于披承先辱緘封倍深感臆

前廣州趙帥遠迎

茲審力辭閩寄歸奉內祠屬以卧疴阻于造謁先勤惠翰倍切感悰

林侍郎被召遠迎

茲承顯膺召節已及近郊屬以卧疴阻于造謁其為瞻企未易敷陳

胡侍郎 絃遠迎 壬戌秋

茲審報政番禺領祠廬阜望鳳姿而在適想鷁首以馳情先辱惠音倍深懷感

謝訪及狀

太守揚秘書方初到訪及 丙辰

竊以蔡戟初臨身驟棲于德宇衣冠已掛迹又掃于公  
門敢期貴老之仁不責致恭之禮枉旌旗于嚴尹實慙  
杜甫之才置薤水于漢陽空效任棠之意其為愧感罔  
既敷陳

太守初到任謝訪及

竊以簞壺填道俶褻刺史之帷轡蓋及門首訪野人之  
室荷搗謙之有甚念往拜之無從愧悚交懷敷宣罔既

賀禮尚 丙辰春

茲審寶龜獻兆銀菟分符條教一新士民胥悅屬櫻疴

而掃軌阻挾刺以登門欣頌攸深名言曷既

再謝訪及

茲承涓選剛辰肇開盛府自惟野老燕賀屢以末由誰  
謂邦君鴈及門而至再深認執謙之德難逃失禮之譏  
感與愧并意非言盡

揚守任滿訪及 丙辰

初聞解組便合曳裾正慚旅力之愆反辱高軒之過其  
為感激未易敷云

趙守除廣憲訪及

茲承榮解舊麾光膺新節特勤寵顧倍激感悚

皇子誕生謝守倅訪及

恭以元子誕生普天頽慶先勤寵頤倍激懽悰

俞漕訪及

茲承升華內閣易節外臺寄委益隆士民交慶特勤寵頤倍激懽悰

趙守謝批考訪及

茲承已書上考行踐中臺阻慶黃堂特勤卓益其為欣感豈易敷云

鄭倅權州謝雨訪及

竊以一雨隨車方謠甘澤雙旌枉駕更誦清風佩謙德

之有加激感悰而無數

倅交印訪及

茲審涓辰洗印浹境均懽已挂朝冠阻趨公屏其為欣愧交集襟悰

又

茲審涓辰惟吉洗印云初坐阻造門首勤迂趾永言欣感交集襟悰

倅交割訪及

茲承榮解印章寵臨蓬華感執謙之過厚愧修慶之末由

又

茲成<sup>承</sup>貳政成功四民交慶阻修漫刺特辱冰銜愧感交  
懷敷宣罔既

路鈐交印訪及

茲承撰良洗印擁騎過門屬以抱疴阻于展慶其為欣  
感罔既敷宣

路鈐交割訪及

茲承榮解印章言歸殿陛冰銜寵逮感臆良深

又

茲承俶解印章將趨環衛賁存斯厚欣感交懷

倅權郡訪及

茲審譽高半刺榮領左符坐阻造門首勤飛蓋其為欣  
愧交集襟悰

又

茲承就領郡章阻干賓贊特勤寵顧但極感悰

又

茲承榮綰州符益隆德政阻干賓謁但劇懽悰

又

茲承已合左符尚分半刺特勤寵顧倍激懽悰

太守謝生日訪及

竊以弧矢四方尚缺生申之慶弓刀千騎坐勤訪戴之  
謙愧荷交深名言奚既

又

竊以神高生甫大昴儲蕭豈惟藩翰之良是乃邦家之  
慶阻奉千齡之酒先勤七寶之茶更屈頌臨彌增感頌  
丁守謝諸司薦訪及

茲審諸臺列薦總計明揚方遲召節之頌先枉使旌之  
過其為欣感交集襟襟

趙守轉官訪及

茲承策勳螺浦增秩穎川未展慶儀先勤盛禮其為欣

感未易敷云

趙守除利路憲訪及

茲承著龜習吉符節交輝阻慶賓筵第深愜志

趙守子過省月望訪及

茲承鯉庭得雋龍節增華適當既望之辰過沐先施之  
禮其為欣感罔既敷宣

郊赦守倅訪及

吉土肇禋普天賴慶首勤寵頌同激懽悰

丁守被召訪及

欣聞嚴召阻綴賀賓首辱頌存倍深悚感

湯倅轉奉議郎訪及

茲審議郎博士已涉朝班除書德音即裁帝制禮勤左  
顧感極下懷

楊待制訪及

一挂朝衣久停賓謁杜門幽屏垣垣難于自踰擁騎光  
臨鞭長有所不及倍感眷存之意騰愧栗之懷

楊閣學訪及

茲審璇宮鳴玉榮超學士之班寶帶兼金寵厚儒臣之  
禮賀厦未容于函往御風已辱于來游快觀爭先雖有  
披雲之幸殿奔敢後寧無策馬之慙

賴守張舍人訪及

特屈隼旗阻瞻鷓首雖抱樂且有儀之喜實慙來而不  
往之非其在感藏曷勝言喻

黃漕訪及

茲承榮特使節倣拜除書特枉芳街阻于賓謁其為愧  
感未易敷陳

黃經畧得祠訪及

茲承穆卜辰良倣均祠逸禮勤左顧感劇中藏

彭常德轉官訪及

茲審奉十行之詔冠六品之階言念哀疲阻修慶謁先



勤寵顧第激懽悰

又轉朝議大夫訪及

茲承榮遷元士特枉芳銜屬以抱疴阻于造謁其為欣感未易敷陳

又轉中散大夫回狀

茲審詔頒宸宸階正卿聯屬以卧疴阻于修慶特勤榮問倍激懽悰

廣州胡侍郎絃訪及

曲荷台慈俯臨陋巷倒屣喜瞻于芝宇曳裾阻詣于蘭舟愧感交懷敷宣罔既

旦望謝訪及

守倅正月望

竊以鷄火中星蠶豪泛粥牙旗穿市雖暫輟于鰲頭御宴傳柑行進陪于班首曲荷顧存之厚就伸頌詠之私  
三月旦

竊以吉朔惟時宜民介祉屬養疴于私室阻修慶于公門頌詠良深敷宣罔既

三月三日

是日初  
送新火

竊以月紀季春燧始鑽而首暨日逢上巳水未禊而先臨念賓謁之無階宜感悰之有甚

四月旦

竊以節紀天祺氣迎夏令當公儀之疊講乃私禮之交  
修其在感藏若為鋪叙

又

竊以清和應候適當告朔之辰豈弟宜民丕受對時之  
祉末由趨慶第切馳情

望日

竊以日臨甲子月滿望舒推豈弟以宜民對清和而介  
祉禮勤左顧感極中藏

五月旦

竊以日永公堂喜來登于農黍風薰廣殿期歸和于帝  
琴念慶謁之無從辱頌存而有愧

又

竊以日永慶霄律中絃賓之朔風薰樂土福歸慈惠之  
師屬以抱疴阻于修謁其為頌詠罔既敷陳

六月旦

竊以律應林鍾<sup>慶</sup>婦良牧屬緣老病阻造公門頌詠殊深  
敷宣罔既

七月旦

新秋倣屆阻瞻召伯之棠舊好彌隆特枉魯侯之駕敬

佩謙勤之意交深感作之懷

八月旦

竊以蟾宮生魄熊軾停驂屬此負茲阻于倒屣仰銜眷  
念俯劇感慚

十月旦

竊以良月應時真賢受祉屬緣老病阻造公門頌詠徒  
深敷宣罔既

十一月旦

竊以開藩浹月肇新視朔之儀飛蓋凌晨遠紹頌廬之  
誼莫違造請徒劇感慙

十二月旦

竊以高正奮若秦臘嘉平黃冠正賴于蜡賓皂蓋特勤  
于熊軾其為感愧罔罄敷云

十二月望

竊以嘉平既望春意將回阻講慶儀茅深善頌

冬年臘雪立春訪及狀

年節太守訪及

竊以月正元日春王三朝瑞先舜牧之班珍奉漢京之  
貢阻陪椽史祇造廟營但深欣頌之懷莫究願言之素  
又

竊以象測璿璣斗柄肇回于蒼陸氣調玉燭春風初入  
于東郊慶良牧之履端對昌辰而受祉阻于賓謁徒致  
頌言

路鈐倅寄居訪及

竊以歲時肇始品物咸新宜集殊禧式符交泰屬緣掃  
軌莫獲造門頌詠良深敷陳罔既

太守冬至訪及

竊以衛兵森戟盛陳亞歲之儀野服黃冠莫點初筵之  
客方展公函之慶已勤都騎之臨感愧交并名言難盡

又

竊以衛兵畫戟有嚴亞歲之儀野服黃冠莫點初筵之  
客遙致錫還之祝允符來復之占謠頌所同敷陳奚究

又

竊以黃雲在望何勞魯觀之登白日初長已著晉卿之  
愛諒丕膺于祉福即歸踐于禁嚴屬此杜門阻于叩閤  
徒深頌詠莫究願言

又

竊以潛陽復覽踐小至之昌期陰德及氓膺大來之多  
祉况績閱素高于朝宇而考功屢奏于民庸願承天地  
之心即上星辰之履阻陪賓席但激懽悰

守倅賀冬

比逢故國茲值陽新阻修亞歲之儀但祝自天之佑頌  
言斯至宣述奚周

倅冬至訪及

竊以潛陽復筦愛景延去豈弟父孚祺祥允集屬養疴  
于私室阻挾刺于公門頌詠攸深敷陳罔既

又

竊以潛陽復筦欣逢小至之辰荒徑荷鋤阻致大來之  
慶其為欣頌罔既敷陳

又

竊以愛日踐長吉人介祉禮勤左顧感極中藏

又

維時亞歲儲祉去人過沐頌存良深感頌

趙叅議賀冬

竊以潛陽復筦欣逢小至之辰哀疾負茲阻致大來之  
慶先勒華翰備認搗謙願承天地之心永受子孫之養  
其為欣頌罔既敷陳

回太守賀臘雪

竊以春元將屆頌銀信于嚴宸臘雪先飛留金穰之大  
惠未展黃堂之慶乃勒阜益之臨愧感交懷敷宣罔既

又

茲以臘雪應期豐年兆瑞臨存甚寵欣感交懷

又

茲以嘉平紀月 密應期阻造梁園首臨袁戶其為欣感未易敷云

太守立春日訪及狀

竊以下寬大之書初行春令底循良之績即慶璽書過辱願存茅深頌感

又

竊以芳春甫屆瑞雪先飄諒和氣之素充致嘉祥之併

集特勤迂願倍切欣榮

謝太守移厨狀

謝楊守 方狀

竊以白屋始開許携于佳醞黃童爭看共掃于漁磯永言眷待之殊倍切感慙之至

又

茲者特飾行厨首陪式燕設一宿之醴良愧穆生合五侯之鯖更慙棲護不遑往拜徒切歸仁

又

竊以秩衛武之初筵儀方抑：設穆生之甘酒禮過區

區枉竹裏之行厨轉茅簷之冬日其為愧感固究名言  
上元  
特枉行厨許陪坐席煥華燈于俎豆加餘惠于輿臺念  
往拜之不遑第懷慚而無已

又

竊以居類少陵鋤江頭之草逕禮加嚴尹簇竹裏之行  
厨有華白板之扉無愧黃樓之會永言謙施倍激感悰

權守

託扮揄之社未展必恭迨萸菊之辰先勤致敬有華車  
從預戒食期雖盛禮之難當願清談之願聽惟慙飯顆

莫稱戾鯖坐深愧感之懷仰冀融明之照

權守開樂

又辱鄭莊之眷置駟馬以請賓今歌衛武之詩設鼓鐘  
而飲酒愧非有名之士輒當初秩之筵禮遇滋隆感慙  
交集

謝移厨後訪及

竊以枉駕肆筵已慙盛禮飛綏三顧尤佩勞謙阻修下  
客之恭但積中心之感

又

疊枉旌幢寵臨蓬華既屬饜于盛德仍敬佩于勞謙往

拜不遑懷慙滋甚

又

竊以獻南岳之嘲正慙鼻祖置長安之駟幸際耳孫既  
莫稱于百籩復屢勤于千騎茲為感悚豈易敷云

丁守

茲承駟召鼎來末陪偉餞隼旗狎至先啟華筵愧感交  
懷敷宣矣既

趙守

特勤車騎光賁草茅醞設穆生厚甚元王之意饌移嚴  
尹缺然杜老之歡感愧交深敷宣曷既

十月

竊以冬日破寒已賴晉卿之可愛行厨治具更勤蜀尹  
之交歡所愧西都之賓莫酬東道之主寸心易感尺牘  
難周

謝趙守相過賞花

花開紅紫已賴春風轂駐朱丹特勤都騎無杜老交歡  
之萬一辱淮陰肯願之再三感愧兼懷敷陳曷喻

答趙守投謝狀

野寂山肴期摻思人之袂繡衣金節坐勤銜袖之書愧  
感交懷名言莫盡



趙守

茲承已拜使華末伸餞禮先勤治具益厚交情感愧于  
中敷陳奚既

謝訪別狀

楊守 方任滿訪別

竊以黃霸再臨人僕八年之久仲尼既用政成期月之  
間何統鼓之興歌已驪駒之趣駕自愧垂車之老阻陪  
卧輒之此悵恨于中喻言曷究

王倅 淹任滿訪別

茲承監州底績解印還朝屬此屏居阻于祗餞過勤別

刺倍極感悰

張憲 垓行即訪別

特枉使車寵移別刺屬養疴于蓬戶阻祗餞于津亭愧  
悚交懷敷宣罔既

彭守 漢老赴常德訪別

茲承之藩卜吉擁騎告行方事藥囊莫陪祖帳其為感  
愧罔既敷陳

斛倅 僖赴調訪別

茲承入朝天闕訪別草廬久抱微疴阻陪偉餞其為悚  
感罔既敷陳

趙憲 善錄 赴利路訪別

茲承印却叱馭欲繼昔賢驪駒在門莫留去轍載披別  
刺祇動離情

梁守 京 奉祠訪別

聯事熊湘嘗託子孫之契持麾螺浦幸依父母之邦承  
歸奉于真祠阻追參于偉餞其為悵戀罔罄敷宣

湯倅 璿 任滿訪別

竊以邦國不空功成別駕驪駒在路歌動諸生坐深賀  
下之情行聽留中之詔特勤營從倍激感悰

胡侍郎 絃 經從訪別

瞻烏在岍禮已闕于將迎浴鳳于池勢方殊于隱顯三  
復冰銜之辱載深芒背之慙

平園續稿卷第十七 終

平園續稿卷第十八

周益文忠公集五十八

記一

賞心樓記 一名東樓

二水中分白鷺洲李翰林金陵詩也今白鷺賞心二亭  
 連延城上元豐中蘇翰林賦長短句送王勝之仍題柱  
 云江山之勝傾想平生名遂傳於天下廬陵亦有白鷺  
 洲青原臺直其首郡治也堆勝樓當其腹驛舍也登臨  
 勝槩雖亞金陵然非閒人所能至盍求之於造物之無  
 盡藏乎乃市民居創小樓介於二者之間借其名曰賞  
 心且少陵江樓語也衡不盈三丈縱又去其一惟費省

故成速蓋洲之項領也目力所及視青原堆勝十得八九而無厲禁可以日涉詩不云乎于胥樂兮願與鄉人共之安知來者無二翰林之才為余賦之也慶元二年二月日

蜀錦堂記

予以紹熙甲寅十月遷新第蓋本郡貢院舊基也東偏買園數畝地勢坦夷名之曰平種海棠數百株蟠根老榦強徒以來中為堂三間南向重簷承雷東西兩榮弗陋弗奢明年花開如錦繡予與十餘客縱目其上皆問何以名堂予曰未也客試名之或曰公昔以布衣舉送

此地今官一品而居之非錦衣畫行乎予謝曰此安陽韓忠獻故事君毋戲我客又曰公嘗以天子命兩帥鄉部縱避忠獻豈不如朱買臣則又謝曰予惟不才不敢以引綬為榮四年之中再命而妻辭賴聖恩從欲許以銷印亦非買臣比也眾客於是合辭曰公昨蜀土於今三朝花滿錦城分派茲圃儻不欲自比前人盍以蜀錦為名上因寓公下指花耳公意何如予謝曰客既合辭予則無辭乃不果辭慶元乙卯三月望

安福縣重修鳳林橋記

造舟為梁文王初為西伯創物之智也人到於今賴之

漢儒著爾雅乃曰天子造舟諸侯維舟大夫方舟士特舟庶人乘泝泝是說也謂辨尊卑可也河橋何與烏郭璞既誤以為周公之言孫炎又從而為之辭其失詩雅之旨遠矣古者郡邑大率瀕江浮航於水加板其上聯屬綿亘以達於岸人之往來其道如砥視招：舟子爭濟於風濤之中險易勞逸蓋相萬也安福壯縣江西湖南之要津水出瀘溪匯于鳳林其廣三百尺是橋不知起何時姑以近事考之元豐縣令上官公穎崇寧縣令上官合增修於二十年之間邑士歐陽安稷名橋曰上官者從其姓也紹興庚申令韓邦光復修之鄉先生王公

庭珪名之曰鳳林者因其地也淳熙丁酉令徐輝又修之邑人劉浚易名濟川則諂矣夫一橋在北門終百餘年四修而四壞何也吏惰財殫葺不以時或葺矣弗良于工故易壞也慶元改元令施廣厚適逢其壞而尉陳章復能奮身任責相與掄材選工舉大舫二十而新之冶鐵為綆紐竹為笮圖惟悠久之計士民咸出力相其役起於季春成於仲秋會太守楊戩方新至首助錢十萬仍歲留征商送州之餘為後日營繕之備章吾故人子也請記其事於今累月行授代去矣安得不為一言夫利涉之功微公家不能成雖成必壞者物理之常也

郡邑無終窮守令有更易坐視弗恤其壞也速未壞亟  
葺其費也省今令尉幸舉職二千石又設儲侍其慮周  
矣徒法不能以自行顧嗣音者何如耳因為辨漢儒之  
失揭鳳林之舊使後之人知公家之利非一族所得私  
若濟巨川非一令所當擬必也即渡名橋隨壞隨葺乃  
百世不易之道也二年三月十五日

廣德軍重修譙門記

天子五門諸侯三之禮也綿之詩曰迺立臯門臯門有  
伉迺立應門應門將之是時古公居岐為商諸侯故鄭  
氏箋云諸侯之宮外曰臯門朝曰應門內有路門天子

加以庫雉其義昭然先儒釋爾雅亦引周禮注天子諸  
侯同此三名惟毛氏因戴記明堂位言魯以庫門為天  
子之臯門雉門為天子之應門遂謂天子郭門為臯正  
門為應而侯門當名庫雉與鄭矛盾孔穎達無所折衷  
既言鄭以臯應自是諸侯正法又云名之曰庫雉制之  
如臯應制二兼四特褒周公以傳毛氏予謂詩經聖人  
所刪記出漢儒之手古公非王也於箋有取焉或曰魯  
史書雉門何也曰禮天子諸侯臺門天子外闕兩觀諸  
侯內闕一觀春秋之際諸侯僭王大夫僭諸侯兩觀猶  
僭庫雉可知經因災以示貶耳書亦言應門何也曰在

周為王門在岐為侯門鄭氏固謂天子諸侯之所同復何疑焉本朝帥藩督府叅用周制其門三重餘二而已儀門之外譙樓巍然以高為貴殆臯門之遺制歟按唐節度使入境州縣築節樓迎以鼓角今遂以是名門其數則節鎮十有二列郡用十著于甲令視漏刻以警昏昕蓋一邦之耳目也廣德為軍名隸江東實隣浙西素號樂土熙寧戊申守臣朱壽昌大修譙門紫微南豐魯公為之記六十年而燬紹興甲子魏侯安行始再營之距慶元丁巳復五十四年枝傾補陋不可以久會承議郎曾侯棗被命分符有絕人之才百廢具舉謂萬乘行

在吳中郡乃近輔華麗嵯峽當應古義適歲豐人和鬻材僦工興役於暮春落成以季夏輪奐之美與創始均其外兩亭東以宣詔西以頒春其內兩樓左曰架閣右曰甲仗前後映帶粲然一新觀者歎服侯以予與其世父原伯先君仲躬同朝相善也不遠二千里請記其事惟南豐古文在前婁謝不敢而請益勤姑為考衆說之異同而識其歲月如此明年戊子三月

萬安縣新學記

學所以明人倫人倫不可一日廢學校其可一日廢乎雖然此王政也故凡君國教學為先而世治則制度在

上虞夏商周皆立大小學於都畿諸侯之國亦必天子  
命之教然後為學者是也世亂則學校不脩禮失則或  
求之野故仕王朝者多有不悅學之說以及其大人列  
國如鄭而青衿不至反朝夕游於鄉之校者是也或疑  
論語一書如帝王曆數之授受邦國政事之得失大而  
道德性命之要小而寢食衣服之節固不及之獨於學  
校略無問答抑嘗深求其故乎司馬遷曰孔子以詩書  
禮樂教弟子蓋三千焉身通六藝者七十有二人如顏  
濁鄒之徒頗受業者甚眾故當是時或問為邦或問為  
政以至祭祀朝覲征伐會盟治民折獄之類講習之已

熟切磋之已至往々隨其才器各底於成舉而措諸事  
業斯無難者是則傳道育材不在乎辟雍泮水而在乎  
杏壇之上洙泗之間也久矣又何問焉宋興藝祖方四  
征不庭已敷幸國學欽崇先聖親為之贊列聖繼志首  
善始京師繇內及外至於慶曆學校遂徧天下蓋祀先  
聖先師于學古也後世郡國廟事而已復古之制且及  
于邑則起本朝若守與令敢不敬承吉之萬安自熙寧  
五年為縣今將百三十載而學凡三徙士不以為然慶  
元戊午夏四月知縣事宣教郎玉牒師道寔來政知後  
先首闢龍頭書院遂議新學相方視址捐直與民得地



二十餘畝以明年三月壬子僦工盡十月而殿宇學舍  
皆成經史之閣左右生之齋內之庫帑庖福外之門闥  
垣墻邃深爽塏幾亞郡學費緡錢以萬計皆士人所樂  
輸而官以餘財助之且為經畫悠久贍給之計纖悉無  
遺往來者但視其成而不知其所以成也諸生請記其  
事某惟夫子教人非可一言而盡其論行藏亦豈一端  
而止然必學成乃許以仕故說漆彫開之對而惡夫賊  
費宰之佞豈嘗使人以政學也哉粵自王道衰而異端  
作霸者之後有楊墨揚墨之後有縱橫有申韓有黃老  
有諸儒之專門至漢唐以來又設科目以取士：方拘

牽時文或不得一意于學今國家開設學校惟周孔之  
教是明惟堯舜文王之道是適為士者雖藉舉業為入  
仕之階然平居父詔其子兄詔其弟自洒掃應對而充  
乎孝悌忠信由聞見卓約而極乎高明光大蘊諸中者  
既不為淫辭詖行所汨則形諸外者亦何適而不可故  
施之試程非駁雜之辭進為師儒得範模之正臨民則  
為良吏立朝則為名臣舉不出乎素學於以副治世化  
民成俗之德意此則賢令承流宣化收：徒學之本心  
也可不勉欤若夫江山之勝棟宇之備與夫竹木工役  
之多寡宣勞協力之名氏令也能文自詳紀于碑陰此

不復云六年庚申正月旦

墨池閣記

唐炯字林夫翰林侍讀學士彥猷諱詢之子錢唐人熙寧四年上書合時宰意用臺薦驟得御史裏行明年二月擢諫官八月復越班論時宰責筦庫廣州徙監吉州太和縣鹽酒稅自公退食學書於官廨池上後數年山谷黃公為令賦絕句云攀檻朱雲頭欲白不知流落向何州空餘前日學書地小閣紅蕖取意秋至元祐中蘇文忠公守杭林夫適赴武昌公得其父舊詩次韻送行有聞道黃門有父風之句謂父子皆善書也今令朝奉

即卓洵泣事三載每葺縣庠增置博士弟子員通四十八人教養課試一視侯類左序東偏接林夫廢廨故沼尚存乃闢其地創閣三間為諸生游息之所用漢張芝故事榜曰墨池著其學書之美請予為之記夫書雖一藝古人猶不苟如此推而上之進德脩業豈止收翰墨之功而已或謂林夫進銳退速亦可取乎予曰吾夫子有言不得中行而與之必也狂狷乎林夫少年時雖異乎中行要非碌碌之士故陳襄述古薦之於經筵而山谷追美於已去之後蘇公復以詩贈別至卓令又表而出之學者其知所擇哉山谷以元豐三年庚申得太和宰

酉歲方上絕句題十一月己卯蓋壬戌年是月二日也  
又明年十二月移德平鎮而去迨慶元庚申兩甲子矣  
三月庚辰周某書

贛州贛縣重修學記

皇朝立學徧郡縣：有附庸有支邑人之言曰支邑距  
城近者百里遠則倍蓰賦租征權間得移用學校之修  
既已非艱而其士又以城闕為遠故庠聲序音自振于  
一邦附庸則不然賦租征權守皆統之士方萃於郡庠  
為令者因得藉口學校名存實否人亦不責備也慶元  
三年冬奉議郎司馬邁來為贛宰深闢其說謂郡庠教

養率限以員今十室必有忠信而曰一州無遺賢誣其  
下也上臺戒橫歛州家不苛取邑之財用有定名或漁  
于吏或費于侈而曰力不及於學誣其上也民之師帥  
當如是乎於是節用度核隱欺首葺大成殿次飾講堂  
齋舍凡重門修廊下至庖福之所器用所湏無一不備  
舊廩歲輸米二百斛緡錢僅以百計經營三載括六鄉  
閒田之所入益錢至三倍既有養士之費則請于州選  
補生員寢食於學月書季考一守成規春秋奠獻如式  
文風郁然遂為外邑之表代更有日書來請記予聞記  
有二說不贊聖人之道則勉諸生以學昔在皇祐賢令

大理寺丞王希聲正廟學太山孫復碑紀其實謂夫子道被萬世非假稱述逮嘉祐中著作佐郎錢顛尤號賢令學政益修每以上之教化士之講習告諸人臨川胡象大書碑陰即而讀之思過半矣予尚何言姑舉司馬君之說附先賢之後使來者知溫國曹緒為政如此非俗吏所能為也尚嗣音俾勿壞六年十月旦

### 梅州重修學記

南海屬郡潮為大潮之邑屬程鄉為大五季偽劉升其地曰敬州國初避今祀廟諱以梅易敬熙寧癸丑嘗歸潮後十年復初紹興丁巳如熙寧纔三年又復甲子適

周矣雖曰僻在嶺表而自唐元和末韓文公守潮首置鄉校謂刺史縣令不躬為之師命趙德督生徒程鄉秀民固在其中至元符初垂三百年劉忠定公又謫于梅每謂語不妄然後可以於誠諄：誨學者蓋天以兩賢加惠茲土舊矣故其士醇其民樸葺學校以教之尤不可已異時二千石自四遐相易而至土風未遽知政事未易脩凡所設施多在累月之後幸無移徙牽制安意營職亦不過期歲已迫合符正使心乎教養而為之也難今劉侯則不然侯潮人也梅治程鄉猶本郡也初仕即尉此習知其風俗周知其財用况大父伯父再世登

科故崇儒之心切而為政之力易下車以慶元五年之  
仲冬越明年閏春之朔即增飾學宮新十哲像徧績從  
祀凡齋舍職事位下至庖湏之屬悉加于舊廣學田增  
生員別創小學四齋絃誦之聲日聞前守陳自修始以  
忠定公配享文公至是各為之祠以瞻以儀厥仲夏告  
朔合僚佐衿佩二百人慶其成於是教授林陶掾曹姚  
得朋程鄉令李昌齋歌詩三章：十句以美之一章頌  
侯之來榮也二章樂庠序之新也三章欲人才之興也  
其歌曰孰不為邦孰守其鄉如被錦衣晝行輝煌侯曰  
上恩曷敢弭忘何以報之俾民向方言葺泮宮于鄉有

光載歌曰宣聖南面珠旒袞章十哲侑坐群賢績廊六  
齋分列小學峙傍談經議道春祠秋嘗我侯辰止率由  
典常又歌曰閭閻諸生振鷺來翔詩書禮樂游息修藏  
勉爾行業為時俊良毋毀于隨毋嬉以荒三歲大比用  
賓于王歌既闋僉曰允哉侔來視予嘉其有美而有勸  
也併紀歲月遺之它日與計偕者依鹿鳴歌是詩轉而  
上聞非此邦之盛事歟侯名渙字伯順今官朝散郎十  
月日具位

梅州貢院記

易曰隨時之義大矣哉時未可為不為可也時既可為

不為可乎降漢迄唐因郡國大小定貢士多寡本朝接  
五季之亂鄉舉寂寥士試州治未有圍棘糊名之制由  
廣而東去國滋遠厥初合一路總貢一士涵養二百餘  
年人才始衆梅之置州適後他邦在法士不滿百併試  
傍郡貢院之不設時也連舉大比至數百人預薦者五  
或即郡庠或寓驛亭始苟簡成之終勞費葺之今太守  
朝散郎劉渙節用儲財肇新試闈亦時也相攸度基廣  
十有二丈深三十有七丈市竹木於龍川擇梓匠於汀  
贛為廳堂各五間其崇二丈五尺廊屋十四間內外門  
各五間封彌謄錄東西厨屋總十間隔街有溪限以編

戶厚償其直徹而達之洞視山川之秀溪中有百花洲  
創佳致亭於其上興工以慶元六年六月壬辰訖事以  
十一月丁巳匠以工計者五千有奇雜役則募間民用  
磚十萬蓋瓦倍之錢以緡計者數千米以斛計者累百  
越十二月朔行鄉飲酒禮發烏程鄉令李昌齡予里人  
也以書道本末且曰州惟一邑向也百役所仰今侯甫  
修學校又為是舉成規定于心餘羨出于州科調毫釐  
弗及其屬願紀實以彰其美恭聞太宗皇帝端拱元年  
放進士二十八人有古成之者預焉雖家廣之增城後  
徙於梅其四世孫華遂登紹聖進士第元符三年藍奎

月立公集  
平園續稿卷十八  
五  
繼擢丙科政和二年則有劉中紹興十五年復有羅振  
四隣望之指為士鄉又况戊申策士維揚而潮人禮部  
尚書王大寶臚傳第二於梅本同州丁丑奏號南省而  
惠人祕書郎張宗卿名冠淡墨於梅為同路兩賢學問  
既過人而立朝持論並為當世所稱詩不云乎高山仰  
止景行：止諸生他日取魏科繼前修尚毋忘二千石  
作成之德明年正月具位周某記

平園續稿卷第十八終



